

**EIGHTH LEGISLATIVE ASSEMBLY OF MIZORAM
(SECOND SESSION)**

LIST OF BUSINESS

FOR SECOND SITTING ON WEDNESDAY, THE 13th MARCH, 2019
(Time 10:30 A.M. to 1:00 P.M. and 2:00 P.M. to 4:00 P.M.)

OBITUARY

1. **Pu ZORAMTHANGA**, Hon'ble Chief Minister to make obituary reference on the demise of Pu F. Manghnuna, former MLA.

QUESTIONS

2. **Questions** entered in separate list to be asked and oral answers given.

**CALLING ATTENTION TO A MATTER OF URGENT
PUBLIC IMPORTANCE**

3. **Pu LALDUHOMA** to raise a Calling attention to a matter of urgent public importance under Rule 59 of the Rules of Procedure and Conduct of Business in Mizoram Legislative Assembly regarding Tax Deduction at source.

LAYING OF PAPERS

4. **Pu ZORAMTHANGA**, Hon'ble Chief Minister to lay on the Table of the House a copy of the Report of the Comptroller and Auditor General of India on Social, General, Economic and Revenue Sectors for the year ended 31 March 2017.
5. **Pu LALCHAMLIANA**, Minister to lay on the Table of the House a copy of the The Mizoram Village Defence Organization (Amendment) Rules, 2017.
6. **Pu R. LALZIRLIANA**, Minister to lay on the Table of the House a copy of the 9th Annual Report, 2016-2017 of Joint Electricity Regulatory Commission for Manipur and Mizoram, Aizawl.
7. **Pu T.J. LALNUNTLUANGA**, Minister to lay on the Table of the House a copy of The Mizoram Lokayukta Rules, 2016.

MOTION FOR ELECTION TO FINANCIAL COMMITTEES

8. **Pu T.J. LALNUNTLUANGA**, Minister to move Motion for Election to Financial Committees.

DISCUSSION ON MOTION OF THANKS

9. Discussion on Motion of Thanks on the Address of the Governor (to be concluded).

S.R. ZOKHUMA
Commissioner & Secretary

....

SPEAKER : ‘Nimahsela rorelna dik chu lui angin luang sela, felna chu luipui kang ngai lo angin luang rawh se.’ Amosa 5:24

‘Tichuan nang chu, "A chhe lai siamthatu," "Mi awmna tûra kawngte siamthatu," an ti ang che.’ Isaia 58:12

Vawiinah hian obituary reference, sunna hun hman a ngai leh tlat mai a, member zahawm tak lo ni thin Pu F.Manghnuna Ex-MLA, January ni 11,2019-a boral ta sunna kan hmang ang a.

Pu F. Manghnuna hi 2nd Legislative Assembly 1989-ah Congress ticket-in Lawngtlai Constituency-ah thlan tlin a ni a, tunah hian amah sunna, obituary hun hmang turin Chief Minister, House Leader zahawm tak i lo sawm ang.

Pu ZORAMTHANGA, CHIEF MINISTER : Pu Speaker, vawiinah hian kan member uiawm tak leh zahawm tak lo ni thin Pu F.Manghnuna, kum 81 mi sunna, obituary kan neih a lo ngai ta a, a pawikan ti a, a uiawm tak zet a. A mimal tak pawhin uiawm ka ti a, amah Pu F.Manghnuna hi January ni 11, 2019 zing lam dar 12: 15 A.M khan Lairam Christian Medical Centre (LCMC), Lawngtlaiah kum 81 mi niin a boral a. Amah hi Pu F.Saihulha leh Pi Chatlemi te fa pariatna niin Saikah khuaah August ni 7,1938-ah a piang a, an unau hi 12 niin hmeichhia 7 leh mipa 5 an ni. Pi H.C Lawnglaih d/o Zahia, Paithar khaw Lal fanu nen February ni 29, 1972 ah an innei a, fapa pahnih leh fanu pahnih an nei a ni.

Zirna lamah chuan Saikah khuaah zirna bul a tan a. Class IX atanga BA thleng chu Shillongah a zir a, B.A a zawh hnuin Guwahati University atangin B.T a zo leh a. College a kal chhung hian A.G hnuaiyah UD/Auditor leh Assam Transport hnuaiyah clerk hna thawkin amah a inchawm a ni. Shillong-a a zirlai hian Regional Student Association (RSA) din theihna turin hma latu leh sulsutute zing ami a ni a, RSA din a nih pawhin President hmasa ber niin term 4 lai a chelh a ni.

Pu F.Manghnuna hi mi taima leh tum ruh tak a ni a, ram rawngbawlina ah pawh a thawh hlawk hle a ni. Kum 1969 September ni 6-ah Assam Chief Minister Pu B.P Chaliha an Pawi Lakher Region Congress President atan a ruat a, chuta tang chuan politics kawng a zawh tan a. MDC term 5 leh CEM

ah vawi 4 leh Chairman-ah term 1 a ni bawk a. Tin, Second Mizoram Legislative Assembly, 1989-ah Congress ticket-in Lawngtlai Constituency-ah MLA atan thlan tlin a ni a, MLA a nih chhung hian MIFCO Board Chairman hna a chelh a ni.

Pu F.Manghnuna hi pa hrisel tak a ni thin a, amaherawhchu a lo upat deuh hnu kum 2017 April thla atangin a in sawisel tan a, Aizawl Civil Hospital-ah kar khat a awm a. January ni 13, 2018-ah NEIGRIMS, Shillong-ah kalpui leh a ni a, hetah hian Pancreatic cancer a ni tih hmuhchhuah a ni. Mumbai leh Kolkatta te pan pui leh a ni a, hemi hnu hian Lawngtlai LCMC-ah admit lehin chemotherapy a la a, vawi eng emaw zat a lak hnu ah amah pawhrawn chak thar lehin motor pawh a khalh leh thein pulpit atangin Pathian thu pawh a sawi leh a ni. Amaherawhchu, December ni 3, 2018-ah a kua a tha lo a, LCMC-ah admit leh a ni a, LCMC-ah thawktuten theihtawp chhuaha an enkawl mek laiin January ni 11,2019 zing lam 12:25-ah chatuan ram min lo pan san ta a ni.

Amah Pu Manghnuna hi mi tam ber chuan kan hre deuh vek ang a, mi chhuanawm, pa viak tha, kawng tinrenga chhawr tlak tak zet zet, chhim lama kan hotute zingah pheichuan politics-a hmahruaitute zing ami a ni a. Tin, society ah leh kohhran lamah nen mi tangkai a ni a. Kan House-ah hian kan chan ropui a, hetiang mi kan MLA hlui te kan lo chan hi uiawm kan ti tak tak a. Vawiin ah hian kei leh he House-a member zawm zawng ten kan vaiin kan chan ropuiin kan ui theuh ang tih ka ring a, chung chu ka rawn sawi a ni e. Pu Speaker, ka lawm e.

SPEAKER : Sawi tur dang kan la awm em? Pu H. Biakzaua, Lawngtlai East bialtu zahawm tak i lo sawm ang.

Pu H.BIAKZAUA : Pu Speaker, ka lawm e. Kan ngaihthlak tak ang khan Pu F.Manghnuna hi mi ropui tak niin ka hria a, a chanchin sawi tur tam tak a awm a, mahse tun hunah hian kan sawi vek seng dawn lo a. Politics chungchangah khan kan House Leader zahawm takin a sawi tawh a, MDC-ah hian Paithar Constituency atangin vawi 3 thlan tlin a ni a, Lawngtlai College Veng atangin vawi 1thlan tlin a ni leh a. Tin, Diltlang Constituency atangin vawi 2 independent-in thlan tlin a ni leh a. Lai Autonomous District Council-ah sawn vawi 4 Chief Executive Member lo ni tawh a ni a, mahse a term te hi

a full-in a hmang thei lo a, kum 8 leh thla 7 CEM hna LADC-ah sawn a lo thawk tawh a ni.

Tin, a CEM tum hmasa lamah khan Disctriect Council sum te saw a tlem thin em em a, nuai 26 chauh a ni a, CEM a nih hmasak tum khan theihtawpin an nawr a, nuai 130-ah District Council fund te pawh an ti pung a. Chutiang chuan Lai Autonomous District Council-ah sawn politics-ah achievement tam tak lo nei a ni a. MLA-ah vawi khat thlan tlin a ni a, MLA a nih chhung pawh khan Minister ni lo mahse hna pawimawh tam tak thawh leh tih a nei nghe nghe a ni.

Tichuan Pu Manghnuna nunah hian entawn tur tam tak a awmin ka hria a, a mizia hi pa titi thiam tak leh thenrual kawm thiam tak; tin, naupang deuh te pawh kawm thiam tak a ni thin a. Puitling leh naupang a thliar na nge tih tur khawp hian keini an fate rual tling manglo te pawh hi tha takin politics thil leh thil tam takah min zirtirin min khawhmuh a, zir tur tam tak a nunah hian hmuh tur kei ngei pawhin ka nei a. Tin, amahah discipline a nei tha em em a, zing takah thoin morning walk kan tih ang hi exercise la in thui tak a kal thin a, a dam loh deuh hnu pawh hian chemo te a la a, tichuan a lo harh leh deuh a. A lo haw hnu pawhin zingah hian a theih chin chin chu a la kal leh thin a. Chutiang chuan taima takin ama hriselna chungchangah inenkawl mi niin ka hria a. Tin, zuk leh hmuam a ti lo va, a entawn tlak em emin ka hria a. Zuk leh hmuam lamah fihlimin midangte pawh zuk leh hmuam that loh thu te hi (a naute ho pawh) min hrilh fo thin a ni. Chutianga amah pawh inenkawl uluk tak leh politics a khelh chhung keini ho in kan hriat ve chin angah pawh hian zing takah tho a, morning walk te a neih hnuin thian lengte a kawm thin a, nihna a neih loh pawhin Lai ramah chuan lehkha ziaktu thenkhat phei chuan 'Lai ram Arsi Lian' tih khawpa a hming an lo hriat leh an lo chhinchhiah thin a ni a. Chutiang taka mi uiawm chu kan chan a ni a, a pawh hlein ka hria a. Vawiina House-a hetiangah ama puala hun kan han hmang ta mai hi a pawh ka ti a, uiawm ka ti tak zet a ni. Ka lawm e.

SPEAKER : Pu K.T.Rokhaw. Hei hian zawhna leh chhanna hun a lak chu kan hriat tlan kha.

Pu K.T. ROKHAW : Pu Speaker, Pu F.Manghnuna chanchin sawi tura hun min pek avangin ka lawm e. Pu F.Manghnuna hi kan House Leader-in a chanchin chipchiar deuhin a sawi tawh a. A chanchin tlangpui

tlem ka hriat ang ang han sawi ve a thain ka hria a. Kan hriat angin amah hi chhungkaw hung tak atanga lo seilian a ni a. An sawi tawh ang khan unau 12, hmeichhia 7, mipa 5 an ni a. Tichuan a nupui hi Pi Lawnglaili a ni a, Paithar khaw lal Pu Zahia fanu a ni a. Hmeichhia 2 leh mipa 2 fa an nei a ni.

Tin, a zirlai hian nichina kan Chief Minister sawi tawh ang khan St. Anthony's College atangin B.A a pass a. Guwahati University atangin B.T a zo leh a. A zirlai hian Assam Transport Corporation hnuaiiah clerk hna a thawk a. Chumi thawk chung chuan a zirlai kha zirchhuak a ni a, amah leh amah inchawma zir a ni.

Tin, anni hunlai kha Pawi Lakher Regional hunlai a ni a. Khami laia Regional Student Association dintute zing ami a ni a, President hmasa ber a ni bawk a ni. Nichina kan hotuten an sawi tawh ang khan Lai District Council atangin term 5 lai MDC-ah thlantlin a ni a. CEM a lo ni tawh a, Chairman a ni tawh a. Kan hriat angin District Council-ah chuan CEM hi hna sang ber, hna zahawm ber a ni a, Chairman-in a dawt a. Chuvang chuan District Council-ah chuan a sang ber pahnih hi a lo chelh tawh a ni. Tin, Lairam Peoples Party din a nih khan a dintute zing ami a ni a, President a lo ni tawh bawk a ni. Tin, MLA-a thlantlin a nih khan MIFCO Board-ah khan Chairman term tawp kha a ni. Tin, a thih ni thleng hian Lai District Congress Committee-ah Vice President a chelh a ni.

Amah hi pa nelawm tak a ni a. Thusawi thiam tak, mi convince thei tak, mi hneh thei tak a ni a, pa tumruh tak a ni. A nunah hian zir tur tam tak kan neiin ka hria, Mizo mipui tan channa nasa tak a nih bakah a bik takin Chhimtuipui mipui te tan chuan hruaitu ropui kan chan a ni. Ka lawm e.

SPEAKER : Pu Lalduhoma, member zahawm tak.

Pu LALDUHOMA : Pu Speaker, Pu F.Manghnuna hi kan ngaihthlak tak ang khan Lairam politician hlun a ni a. Delhi tlangah pawh khuan a tlangnel em em a, ram leh hnam tan vawi tam tak a feh chhuak thin a, Lairam Peoples Party President a nih lai te khan kan han in zui ve zar zar a. Pa tlawmngai, pa chak leh hrisel tak, pa rorum tak a ni a. Khawlaiah pawh hian diak leh bawngkek te pawh hi ke lawnga rap bawrh bawrh mai thin a ni a, kan tluk lo hle mai a. Mimal taka ka hriatchian leh ka ngainat a ni a, ka ui khawp mai.

A upat hle tawh hnuah pawh hian Lairam politic-ah sawn a ngaihdan hi lak a la ni fo a. Thangthar ten a hnen atangin thil tam tak thurawn te an dawngin a thih ni thleng hian mi pawimawh tak a ni a ni. Chutiang mi kan han chan chu a vanduaithlak hle a. Amaherawhchu a dam khua te a sei a, mihring ngaihah pawh a lungawithlak thawkhat a. A kalsan tak a chhungte Pathian thlamuannain awmpui se tih kan duhsak em em a ni. Ka lawm e.

SPEAKER : Kan duh tawh tawh ang a. Tunah member zahawm tak lo ni thin Pu F.Manghnuna sun nan minute khat kan vaiin i lo ding ang u. (Member-te minute 1 ngawi rengin an ding).

I lo thu ang u le. Vawiinah member zahawm tak kan Deputy Chief Minister Pu Tawnluia leh Pu Ngunlianchung a leh Pu V.L.Zaithanzama te taksa harsatna avangin an lo kal thei lo a ni.

Tunah chuan zawhna leh chhanna kan tan tawh ang a. Zawhna leh chhanna hi zawhbelhna hi mi pahnih a tawh kan ti em? A chhan chu term hmasa khan pahnih kha kan ti a. Hemi hnunglam amite tan hian zawhna hi chhuak thin se an duh ve thin si a. Chuvangchuan a dial dial theih nan a zawttu bakah pahnih la ta ila tha kan ti em? Ti mai ang aw. Le, member zahawm tak Pu Duhoma zawhna zawt turin i lo sawm ang.

Pu LALDUHOMA : Pu Speaker, Home Minister zahawm tak chhan atana ka zawhna :

- a) Supreme Court-in Home Guard te duty allowance, police constable hlawh zat ni tura judgment a siam kha tipuitling tawh state an awm em? Chung state te chu engtenge?
- b) Hemi chungchangah hian Mizoram sorkarin engtin nge hma a lak ve?

SPEAKER : Chhang turin a changtu Minister zahawm tak Pu Lalchamliaana i lo sawm ang.

Pu LALCHAMLIANA, MINISTER : Pu Speaker, member zahawm tak Pu Lalduhoma zawhna kha a chhiarchhuak tawh bawh a, hun a rei loh nan zawhna kha ka chhiar lo ang a. A zawhna chhanna chu :

- a) Supreme Court-in Home Guard te duty allowance police constable hlawh zat ni tura judgment a siam tipuitling tawh state an awm leh awm loh Mizoram sorkarin record a nei lo.
- b) Supreme Court judgment ang hian Home Guard ten hlawh sang zawk an hmuh ve theihna tura rawtna sorkar-in a ngaihtuah mek a ni.

SPEAKER : Zawhbelhna.

Pu LALDUHOMA : Pu Speaker, Supreme Court judgment hi kum 2015 ami tawh kha a ni a. India ram state zawng zawngin an zawm tur a ni a. Chutahchuan Google atang tea ka han en thwak thwak hian Delhi te, Goa te, Telangana te, Haryana te, Punjab te, Manipur te hian an tihlawhtling tawh niin a lang a.

Tin, a la tihlawhtling lote pawhin an kalpui mek niin a lang a. Ka zawhna pek leh min chhanna hun inkar hi a chep deuh a, chuvangin department tan pawh state hrang hrang atanga information lakna hun a tlem a. Amaherawhchu kha kha an lo bawhzui zel thei ang em tih ka rawn zawt phawt a.

Tin, Mizoram sorkar pawh April 2017-ah te, April 2018-ah te, September 2018-ah te Home Ministry hian he thil hi lo tihlawhtling ve turin a rawn nawr reng a. Chuvang chuan hei hi tihlawhtlin tur hrim hrim niin a lang a. Pu Speaker, an duty hi Police nen hian a dang lem lo va, ralthuamte nena duty thuhmun nei an ni a, 13 months pay an la ve lova, medical reimbursement an nei lova, 30 days leave-te pawh an nei lova. An hlawh chungchangah hian 50% hi Govt. of India tum tur a ni tho bawk a. Tin, tunah hian hmun za dawn laiah duty pawimawh tak tak an khawih a. A then hi chu reimburse loh tur a ni a, a tam zawkah hian reimbursement hmuh a ni a, an hlawh a san poh leh an thawk chhuak hnem ve leh mai dawn a. Chuvang chuan kum khatah hian nuai za tel tam tak anmahni ngei hian an thawk chhuak tlat a ni. Chumi a nih avang chuan Police pangngai hautak taka maintain ai mah mah hian anni hi kan cheibawl that chuan sorkar tan pawh a hlawk zawkna lai a awm ve tho mai a. Chuvangin Supreme Court judgment hi a rang thei ang berin kan sorkar hian han bawhzui vat vat in a tihlawhtling thuai thei ang em tih kha ka han zawt a ni e.

SPEAKER : Chhang turin Minister zahawm tak i lo sawm ang.

Pu LALCHAMLIANA, MINISTER : Pu Speaker, Home Guard-te hamthatna hi sorkar hian a ngaihven reng a, sorkar hmasa pawh khan Home Department atang chuan he Supreme Court order Home Guard ten Police hlawh ang thla khata ni 30-a chhutin pek ni rawh se a tih ang hian rawtna chak takin a lo siam tawh a. Mahse Finance-ah PRU khan ‘pawisa a awm lo e,’ tiin an lo reject a ni. Sorkar thar a lo pian hian tunah hian Supreme Court judgment tihlawhtling tur khan rawtna thar kan siam leh a, chu chu Finance-ah hian a la awm mek a. A tha zawnga thu tlukna kan beisei mek a ni tih ka sawi duh a.

Tin, member zahawm takin a sawi ang khan kan Home Guard-te an rim khawp a. Tin, revenue earning kan tih angte pawh hi an nei ve teuh a ni. Hlawh pawh 50% central-in a tum a 100% state sorkarin. Chu chu tunah pawh hian zuk zawh chian leh tawh a ni a, khatiang khan tih theih a la ni em tiin central sorkar Home Ministry chuan 50-50-in kal zel tur a ni ang tih a ni.

Tunah hian Home Guard-ho sanction strength hi 1076 an ni a, tam tham pawh an ni lova, chuvang chuan Home Department-in kan beisei dan chuan Supreme Court order a ni bawk a, Finance Department lamte pawh hian min phalsak thei mai lo maw aw kan ti a ni. Ka lawm e.

SPEAKER : Zawhna pahnihna zawt turin member zahawm tak Pu Vanlalhlana i lo sawm ang.

Dr. VANLALHLANA : Pu Speaker, ka lawm e. District Council & Minority Affairs Department changtu Minister chhan atan :

- a) Chakma Autonomous District Council-ah hian CAG Report hi kumtin pharh ziah a ni em?
- b) An table loh chuan a chhan min hrih thei em?

SPEAKER : Chhang turin a changtu Minister zahawm tak Pu R.Lalzirliana i lo sawm ang.

Pu R.LALZIRLIANA, MINISTER : Pu Speaker, ka lawm e. Member zahawmtak, Pu Vanlalhlana zawhna chhanna chu :

c) CAG Report hi Chakma Autonomous District Council hian an dawn atanga Session hmasa berah an pharh thin tih a ni a. A pahnihna hi chu an pharh avangin chhanna a ngai lo a ni.

d) N.A

SPEAKER : Zawhbelhna, zawhna neitu Pu Vanlalhlana i lo sawm ang.

Dr. VANLALTHLANA : Pu Speaker, ka zawhbelhna chu hei hi a ni.

Eng kum thleng nge CAG Report hi pharh a nih tawh? Nikum te, 2017 leh 2018 khan pharh a ni em?

SPEAKER : Pu Zodintluanga, member zahawm tak i lo sawm ang.

Pu ZODINTLUANGA RALTE : MP inthlan hun puan a ni tawh a, Model Code of Conduct-in min phuar vek tawh a. Nimin, ni 12 khan Chakma Autonomous District Council-a nominated member-te appointment order kha a chhuak a. Kha kha cancel leh tur a ni em tih ka zawt e.

SPEAKER : Pu KT Rokhaw i lo sawm leh ang.

Pu KT ROKHAW : Chakma Autonomous District Council huam chhungah hian Chakma, Bangladesh atanga lo kal foreigner-te khaw thar din a awm em?

SPEAKER : Chhang turin a changtu Minister kan sawm ang a. Zawhna hnuhnung ber kha a dang deuh hlek a, a chhan theih loh pawhin a theih ang ang han chhang teh se, i lo sawm ang.

Pu R.LALZIRLIANA, MINISTER : Pu Speaker, member zahawm tak zawhna neitua a han zawh kha ka han chhang hmasa ang a.

CAG Report hi kumtin dawn a ni lem lova, CAG office atangin CADC chungchang kum 2009-2010 to 2014-2015 CAG Report dawn chu Council-ah hian ni 11.12.2017 an session-ah khan pharh a ni a. Hemi hnu lam chu pharh a la ni lo a ni. Tin, 2015-2016 CAG Report pharh ah khan 1.2 crore sum hman dik loh chungchang tarlan a ni a, DC & MA Department atangin sawifiah tura hriattirna pek an ni a. Ni 9.1.2017-a an insawi fiahna chu AG office-ah an thawn a, hemi chungchang bawh hi Mizoram Legislative Assembly Secretariat atanga zawhna ni 3.7.2017 hian chhanna pek a ni bawh a ni. CAG

office-in MLA Secretariat-a insawi fiahna pek a nih hnu hian sawi zuina a awm tawh lo. CAG Report 2016-2017-ah hian an han en khan 2.87 crore chu hmanna tura ruat lawk ni loah hman nia tarlan a ni a, hei hi Lawngpughat to Kukurduleya road siamna a ni a.

Hemi chhanna ni 16.5.2018-ah khan AG office-ah thawn leh a ni a. Diklo taka hna lak chungchanga AG Report-a tarlan chu 23.1.2018-ah AG office-ah a chhanna pek a ni bawk a ni. Pu Speaker ka sawi belh duh hlek chu tunah hian Autonomous District Council-ah hian diklo taka sorkar hna lak a tam hle niin hriat a ni a. Heng hi Governor-ah chhui phalna dil a ni a, tunah hian Chakma Autonomous District Council chauh lo ah pawh danlo anga hnathawk nia hriatte an awm nual a ni. Chu chu member zahawm tak Pu Vanlalhlana zawhna chhanna ni ta sela.

Pu Zodintluanga zawhna kha nominated of member appointment order kha hemi lo chhuah hma hian tihfel vek tawh a ni a. A chhuah leh chhuah loh chiah chu ka hre lova, cancel tur chu a ni lo ang a. Dan in a phal loh chuan hnuh kir leh a ni ang, nakinah an chhuah leh mai a niang chu!

Tin, Pu Rokhaw, member zahawm takin khawthar din a sawi kha chu, MNF sorkar a lo din leh chhung hian khawthar pakhatmah din a awm lo a ni tih kha ka chhanna a ni.

SPEAKER : Starred Question 3-na zawt turin member zahawm tak Pu Lalduhoma i lo sawm ang.

Pu LALDUHOMA : Pu Speaker, ka lawm e. PHE changtu Minister zahawm tak chhan atan :

- a) Neihloh khaw Water Supply Scheme atana hmalakna a awm em?
- b) Sihphir tuikhur tui pump tumna a awm em?

SPEAKER : Kan hriat angin a changtu Minister zahawm tak hi a damlo a, Chief Minister zahawm tak a authorised a. Kan Chief Minsiter zahawm tak i lo sawm ang.

Pu ZORAMTHANGA, CHIEF MINISTER : Ka lawm e, Pu Speaker. Member zahawm tak Pu Lalduhoma zawhna chhanna chu :

- a) Neihloh Water Supply Scheme hi National Rural Drinking Water Programme (NRDWP) hnuaiiah van ruahtui khawlina (Rain Water Harvesting Scheme) thawh mek a ni.
- b) Sihphir tuikhur tui pump tumna ruahman sa a awm lova, Solar Pump hmangin a tih theih dan survey neih mek a ni.

SPEAKER : Zawhbelhna Pu Lalduhoma.

Pu LALDUHOMA : Pu Speaker, ka lawm e. Neihloh khua tluka tui harsatna hi Mizoramah hian a awm lo hialin ka ring a. An harsatna saw a namenlo khawp a, an khawngaihthlak hle a ni. Sihphir, an tuikhur tlan lai hi leimin in a chhilh a ni. A tuihna hi a tha thawkhat a, tanky an siam saw rain water harvesting atan a ni a, a ruak vek a, a ruah reng chuan a chhe leh mai dawn a, tui dah tur a awm si lova. Sihphir atanga tanky sang ber awmna hi meter 80 a ni a, a hlat lam hi meter 300 a ni a. Tin, Tuifar a awm leh a, hei hi a tha zawk mah a, a san zawng hi meter 135 niin a hlat zawng hi meter 350 a ni. Hemi pahnih hi Diesel hmanga pump in emaw, solar-in emaw tihsak hram dan hi awm thei sela, an khawngaihthlak lutuk a. Lui tui pump-na a hla bawk si a, a engemaw zawk zawk hi survey te han kal thei sela, a rang thei ang bera min tihhlawhtlin sak turin sorkar hian hma min lak sak thei ang em?

SPEAKER : Zawhbelhna, Pu B.D.Chakma i lo sawm ang.

Pu B.D.CHAKMA : Pu Speaker, ka lawm e. Chawngte Greater Water Supply Scheme (Speaker : A Minister a awm lova, hei hi thilthar kan tih chiahna a ni a, chuvangin zawhbelhna kan ti tho a ni) hi sorkar hmasa ah pawh NEC-ah a awm in kan hria a, waiting list ah hian. Hei hi hmalak tumna a awm em, implementation chungchangah hian? Tui a harsa em em a, thlakhat ah tui sem pawh a awm lova, he scheme hi beiseina a awm em tih ka zawt duh a ni e.

SPEAKER : Kan sawi ang khan Minister a awm lova, incharge a pekin a chhan loh pawhin a pawl lova, zawhbelhna kan hawng hrim hrim kha a tha a ni. Tunah chuan House Leader chhang turin i lo sawm ang.

Pu ZORAMTHANGA, CHIEF MINISTER : Pu Speaker, ka lawm e. Member zahawm tak Pu Lalduhoma sawi Neihloh khuaa Water Supply Scheme kha sorkar-ah te kan han awm lo rei a, tunah kan tan leh chiah a ni a, an tui harsatna kha kan lo hria a. Tunah hian Rain water Harvesting Scheme-in hma lak mek a ni a, kan lo en zui ang a, Engpawhnise a principle-a ka sawi duh chu, tui in tur mipui ten kan neih theihna tur chu tih tak zet zeta hma lak kan tum a; chaw te tui te eng te hi kan mamawh zual a ni a. Chuvangin Neihloh khua pawh kha Rain water Harvesting Scheme kha a tawk thei ang ngem tih kan lo enchiang dawn nia. An tawk theih loh pawhin theihtawpin hma kan lo la zui ang tih ka sawi duh a ni. Tin, Sihphir pawh kha ka bial a ni nghe nghe a, hma lak kan tum a, hmun tam berah hian a theih hram chuan Rain water Harvesting Scheme hi a tam thei ang bera tih hi tha kan ti a ni. (Pu Lalduhoma : Kan khawdai ami khi a ni e.)

Pu Speaker, kan bial Sihphir zawk khi emaw ka ti a ni. Engpawhnise, theihtawpin anni khua khi tui supply mipuiin an hmuh theihna turin hma kan lo la ang. Kan sorkarin mipui tui in tur hi kan ngaih pawimawh a ni.

Chutiang bawkin Chawngte lam pawh kha kan lo enzui ang a. District Council Headquarter hmun pawimawh a ni a. A chheh vela tui nei tam an ni bawka, harsa lutuk lova neih dan a awm ka ring a ni. Tui in tur tha an neih ngei theih nan theihtawpin hma kan lo la ang e.

SPEAKER : Member zahawm tak Pu Lalduhoma i lo sawm ang.

Pu LALDUHOMA : Pu Speaker, ka lawm e. PWD Minister zahawm tak chhan atan :

- a) Neihloh khaw kawng laih mek hi engzata thui nge a nih?
- b) Tunge a contractor ?
- c) A estimate zat ?
- d) Target date of completion ?
- e) Black top tura thawh zui a ni dawn em ?

SPEAKER : A changtu Minister i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Pu Lalduhoma zawhna chhanna :

- a) 0.000 kmp –m 9.89
- b) H.Zoremthanga, Chhinga veng.
- c) ₹ 1610.25 lakh (Estimated Amount)
₹1397.66 lakh (Agreement Amount)
- d) 8th October, 2019.
- e) Black top tura thawhzui tur a ni.

SPEAKER : Zawhbelhna Pu Lalduhoma i lo sawm ang.

Pu LALDUHOMA : Pu Speaker, ka lawm e. Ka zawhbelh duh chu sawlai kawng saw eng division hnuai a awm nge? Tin, hnai zawk fe ah Nei loh panna kawng hi a awm thei a, a kual thei ang berin Kanghmun lamah a va kal phawt a, a rawn let leh a. Khaw mipuite sawn an duh lo em em a, khaw mipuite an rawn lo em ni engatinge a hla thei ang zawnga he kawng hi zawn a nih tlat le tih kan zawhbelh teh ang.

SPEAKER : Chhang turin House Leader i lo sawm ang.

Pu ZORAMTHANGA, CHIEF MINISTER : Pu Speaker, he kawng hi Buangpui khua atanga pen tir, kal tir mai awm tak kha a ni reng a. Amaherawhchu a kawng an han zawn khan mimal ram Pu Zakhuma, Buangpui ram kha kaltlang a ngai a, compensation a phut kha a tam ang reng viau baw si a, PMGSY-ah compensation tih a rem baw si lova. Chuvangin compensation pe lova a kal theihna awmchhun kha Kanghmun South to Neihlawn road tiin Kanghmun South atangin an lai ta ringawt mai a. PMGSY-a compensation awm si lo leh pek ngai baw si kha sut luih theih a ni ta lova, chuvanga hei hi tih a ni.

Tin, Pu Speaker, han sawi belh takah chuan helai kawng hi bitumen/alkatra kawng tur anga a tirah chuan ruahman leh a scheme-in a tum a ni a. Amaherawhchu kan ramah hian bitumen road/bitumen pavement-te hi a tlo lo em em mai a. A theih hram chuan cement concrete kawng hian tih tum

a ni a, chuta tan chuan pawisa pawh hi a tira sanction aia tlema contractor hian a chhan avangin a tira sanction ang hian concrete hian a tih theih tho mai awm mang e aw an ti a. Amaherawhchu phai lama thuneitute hnenah, PMGSY thuneitute hnenah phalna lak a ngai a, kha kha an buaipui mek a ni a. Chuvangin tunah chuan concrete-a tih theih hram a nih chuan tih tum a ni bawk a ni tih ka han sawi tel a ni.

SPEAKER : Tunge phar kha? Dr. Thiamsanga, a phar hmasa zawk helam hi aw?

Dr. ZR. THIAM SANGA : Pu Speaker, ka lawm e. Kum tam tak kawng chhia kan buaipui ta a, hemi siamtha tur hian tuna kan sorkar thar hian hmalakna emaw, ruahmanna a nei tawh em tih ka rawn zawt a ni e.

SPEAKER : Pu C. Lalsawivunga, MLA zahawm tak.

Pu C. LALSAWIVUNGA : Pu Speaker, ka lawm e. Seling leh Champhai inkar kawng contractor hi tunge tih ka zawt a. Tin, a completion target kha enge (a hun chhung kha) tih ka zawt a. Tin MoU contractor te nena siam a nih hian a maintenance hun chhung hi kum engzat nge a huam tih ka zawt bawk e.

SPEAKER : Chhang turin Chief Minister zahawm tak kan sawm ang a, a inkarkik deuhhleik a, a theih dan danin chhang turin i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Dr. Thiamsanga zawhna kha, kan theihtawpin kawng te hi tun fur hmaa tlan theih tura a theih ang chin chin siamthat tumin pawisa awm ang ang pawh kan han la khawm a, amaherawhchu siam tur hi a tam ve hrim hrim mai a. Tichuan, beihpuiin Department pawhin an han bei a, chutah chuan hmun tin mai khawpui chhung te, kar kawng te, kawng tinreng hi chu tih sen rual a ni lova, kawngpui a tlangpui deuh deuh touching te, khawilai han rem that tur te hemi fur hmaa tih theih chin chin hi chu ti turin pawisa pawh a awm ang ang kan han vawm a, an tih hman phawt chuan, a tul belh chuan kan financial tharah pawh pek belh zel kan tum a. Kawngte hi a siam pui, a laih pui hi chu thuhra a nia, hei hi chu project hranin a kal a, a maintain-na erawh hi chu theihtawpa ti zui turin hma kan la chuk chuk a, pawisa awm ang pawh kan pe zel a ni tih ka han sawi duh a ni. Member zahawm tak zawhna pakhat Seling-

Champhai road kha chu tlemin (nia kan sawi ang khan) kan la tharlam deuh a (kum sawm hnua rawn awm leh hi kan ni a) vawilehkhata kan memory atanga, tu company nge tih hi (company te hi hming mak pui pui a lo ni a Pu Speaker, khang kha chu eng emaw zawhna dangah lo chhuak sela, hetia karkik han ralkhat puah pui phawng mai ah chuan) information ka dawng hman bik lo a, min lo hriatthiam ka beisei e.

SPEAKER : A lawmawm e. Zawhna 5-na zawt turin Pu Lalduhoma i lo sawm ang.

Pu LALDUHOMA : Pu Speaker, Public Health Engineering Department changtu Minister zahawm tak chhan atan ka zawhna te chu :

- a) Thenzawl Hermon veng leh a chhehvel te tan hian engtikah nge tui connection pek a nih ang?
- b) Thenzawl Ayush veng leh Tualvungi vengah te hian gravitation hmanga Water Supply Scheme ruahman tumna a awm em?

SPEAKER : Chhang turin a changtu Minister zahawm tak i lo sawm ang. A awmlah avangin kan sawi ang khan Chief Minister kan sawm leh mai ang.

Pu ZORAMTHANGA, CHIEF MINISTER : Pu Speaker, member zahawm tak Pu Lalduhoma zawhna chhanna chu :

- a) Thenzawl Hermon veng leh a chhehvel te tan hian NEDP hnuaiah distribution line thawh mek a ni a, siam zawh veleh tui connection pek theih a ni ang.
- b) Thenzawl Ayush veng leh Tualvungi vengah te hian gravitation hmanga Water Supply Scheme ruahman sa a awm rih lo. Thenzawl Ayush Veng leh Tualvungi Veng tan hian NEDP hnuaiah Thenzawl existing water supply atanga pekna tur distribution system extension hna thawh mek a ni e.

SPEAKER : Zawhbelhna, Pu Lalduhoma.

Pu LALDUHOMA : Pu Speaker, zawhna hnukung ber a ni tawh a, hun a la tamin ka hria. Hermon Veng tui pek saw a har hauh tawh lova, tanky te a awm vek a, pipeline pawh a then chu pek nghal theih tawh niin a lang a. Tuna distribution line tih mek a ni tih kha thla thum chung te hian zawh theih a ni tawh ang em? Engtikah nge zawh theih a nih ang? A har lo viau tawhin ka hria, a hmun ngeiah ka en vek tawh a, chu chu ka zawhbelh duh a.

Tin, Ayush Veng hi Tualvungi Veng nena inzawm a ni a, Ayush Hospital tha deuh mai a awm a, tui an nei miah lo a ni. Ayush Hospital building kawtah sawn tlang bawk a awm a, saw saw tanky dah nan an remti a. Tuna a extention hi a tha tho a, amaherawhchu khami puibawm tu atan khan gravitation-a tui lak tur hmun hniah a awm a, pakhat chu Lenbur lui a ni a, chu chu a hmun ngeiah hmannah a hnar thlengin keimah ngei pawh kal in ka zawh vek tawh a, a tha thawkhat a. Tin, Lungrang ramah sawn lak tur a awm bawk a, hei hi a pipe pawh eng emaw chenah chuan kal kawp tir mai theih tur a ni a, chu chu Ayush Hospital bulah sawn tanky dahin hmun dangah a la sem darh theih a. Hei hi khawngaih takin an lo survey thei ang em a department hian? Lo en sela, a maintain kha a awlsam zawk dawn a, a extention pangngai ai chuan a tih tlakin a lang a. Chu chu survey te min lo tih sakin work schedule-ah te min lo thun sak thei ang em tih ka zawt duh a.

Tin, a tawp berah chuan tuna PHE line pangngai extension, Ayush veng leh Tualvungi veng a tih tum hian engtia rei nge a duh ang? Engtikah nge zawh fel theih a nih ang tih ka zawt bawk a ni e.

SPEAKER : Pu Vanlalhlana i lo sawm ang.

Pu VANLALHLANA : Pu Speaker, zawhbelhna. Ka inthlahrung viau na a, a Minister incharge a awm lova, amaherawhchu, kan House Leader-in min chhinchhiah sak thei tho ang chu. Leitan te, Durtlang te, Durtlang North te kan hre vek ang a, tlangchhipa awm a ni a. Tui an harsa tlangpui em em mai a. An harsatna tikiang tur hian sorkar hian hma la tur hian eng ruahmanna nge an neih tih te ka zawt duh viau a.

Tin, Doordarshan tlanga tanky ring ve si lo, Bawngkawn tanky ring ve si lo in 30 vel khi Durtlang leh Bawngkawn inkarah khian a awm a ni. Khingte khian house connection an nei lova, chhungkaw 30 vel an ni a,

Durtlang atanga pek tur nge, thlang lam an ring thei bawk si lova. Khing harsatna khi min lo hriat sak se tih ka ngen duh a ni.

SPEAKER : Zawhna a ni lo a ni maw? Ngenna a nih chu. Member zahawm tak Pu Andrew H. Thangliana i lo sawm ang. Kha kha a tawpna a ni dawn.

Pu ANDREW H. THANGLIANA : Pu Speaker, hmar tlangdung, Serkhan-Bagha inkarah khuan Bukpui hian reservoir tha tak an nei a, tuihna pawh an nei tha em em a. Amaherawhchu, a tui hi kumtluan hian a nu a ni deuh ber a. Khi khi a filtration system te min endik sak in min rectify sak thei ang em tih hi ka zawhna a ni e.

SPEAKER : Zawhna a ni lo a ni maw? Tunah khan member pahnihin zawhbelh theih ti ang aw, kan ti a. Tin, Minister a awm bawk lova. Pathian zarah kan dam ang a, in duhtawkin in zawt dawn nia. Tuna kan sawi zawh hlim hlawt ang khan i kal ang. Pahnih bak kha chu a theih loh aw. A chhan theih chuan kan House Leader zahawm tak khan chhang se, i lo sawm ang.

Pu ZORAMTHANGA, CHIEF MINISTER : Pu Speaker, a hnukung lam atang khan han tan ila. Member zahawm tak sawi kha tlema chiang lo lai deuh ka nei a. Bukpuiah tui source a awm a, engtin nge i sawi kha, a nu thin i ti em ni kha? Ngawi rawh, i sound kha i ti ring thei deuh em?

Pu ANDREW H. THANGLIANA : Kumtluanin an tui pek khi a nu a ni, a thianghlim lo em em mai a. A filtration lam kha min endik sakin min rectify sak thei ang em tih a ni.

Pu ZORAMTHANGA, CHIEF MINISTER : Aw le, kha kha a Department pawh en turin kan lo ti ang e. Tui nu han tihfim chu thil harsa a ni hauh lo. Kan hmuh angin Tlawnga kan lak chhoh pawh nu tak a ni a, mahse an han tithianghlim a, thianghlim tha takin kan nei thei mai a. Chuvangin, a khua ten tui nu an hmuh kha a tih thianghlim theih dan Department hovin an hre em em ang tih a rinawm a. Chuvangin, a en turin hma kan lo la ang e.

A dawt lehah chuan member zahawm tak Pu Hlana zawhna kha, Durtlang lam khi a ni tak a, a hmun a sang deuh bawk a, beih fe a ngai a. Engpawhnise, hmalak tur kan la ngah khawp mai a. Thenkhat phei chuan

Tlawng tui pump lovin, Tuirial lam side ami tui pump chhoh tur te pawh a awm lo em ni tih te pawh rawtna chi hrang hrang a awm a. Engpawhnise, hetatanga Tlawng tui pump, a phase hrang hrang atanga kan capacity kan supply theih chi te enin, hemi in a daih chinah pheih chuan theihtawpin hma kan lo la ang a. Tin, a dang tihbelh ngai a nih chuan Aizawl khawpui in tui kan mamawh belhna hi a nasa zual zel dawn a. Hei chu tih tak taka hma lak ngai niin kan hria a. Kan lo enpui ang a, amaherawhchu, sawi leh sawi hnu, kan la zir tlang lova. A chhan chu Department-in an hmalak hnuhnun ber chin te han zir pui a, 'hemi chin hi a thleng tawh e, heti zat hi kan la nei thei ang, heti zat hi kan hung duh tur a ni,' han tih turah khan, hun a tawi deuh leh kan la chian kim loh avang leh a Minister changtu dam lohna nen rei tak rawn en thei lo a nih avang hian kei pawhin an nitin hnathawh chin leh, eng chin nge a la duh ang tih kha verbal-a han chhan mai tur chuan ka hre kilh kilh lo a. Amaherawhchu, tui in turah chuan theihtawpin hma lak chak kan lo tum ang a. Tin, tui connection nei lo te pawh a theih ang tawka pek kim hram hram kan lo tum ang e.

Member zahawm tak Pu Duhoma han sawi ang khan pakhatna ah chuan gravitation-a lak theih tur tui tha a awm theih phawt chuan kei pawh kha kha tha ka ti a, kan lo en ang a. Tin, a hlawk pawh a hlawk a. A maintainna a awlsam a. Kha kha chu kan lo enzui ang a. Department-in gravitation-a tui lak tur tha a awm phawt chuan kha kha theihtawpin kan lo ti ang. Tin, tuna tui connection extension an tih mek hi eng hunah nge an zawh ang tih kha chu ka sawi thei mai bik lova. Mahsela, theihtawpa chaka zo turin a tur pawh kan lo tur ang a. Department-in theihtawpin hma kan lo la ang e.

SPEAKER : Kan zawhna hun kan zo a ni mai a. Tunah hian zawhna hi 5 chauh a rawn lut a. Zawhna hi 139 a rawn lut a. Kan Secretariat te khan Department-ah an thawn nghal zung zung a. A rawn chhan letna hi panga a rawn lut leh a ni. Amaherawhchu, nizan lamah te a lo lut leh a. Tichuan hei, a rawn kal zel a. Tunah hian member te kan thiam lo deuh a ni. Kan che tlai hret a, zawhna hi a tam lo a ni.

A dawt lehah kan kal ang a. Calling Attention kan nei dawn a. 'Calling attention to a matter of urgent public importance under Rule 59 of the Rules of Procedure and Conduct of Business in Mizoram Legislative Assembly regarding Tax Deduction at source' hun hman a ngai a. Member zahawm tak

Pu Lalduhoma'n kan dan bung 59-na hmangin 'Calling attention to a matter of urgent public importance' a pulut a. Dan ang thlapa dil a nih avangin admit a ni a. Tunah chu hun chu hmang turin Pu Lalduhoma, member zahawm tak i lo sawm ang.

Pu LALDUHOMA : Pu Speaker, Calling Attention min pawm sak avangin ka lawm e.

Hei hi tun hnaia Tax deduction at source, tribal te huapa central lamin an rawn tih chungchang a ni a. Pu Speaker, kan hriat angin Income Tax Act 1961, Section 10, (26) hian tribal te hi income tax min awl a. Tribal te chu tute nge kan tih chuan India Constitution Article 366-na, Clause 25-in a sawi te kha kan ni a. Hetia tax exemption neite hi chi 4 kan awm a. Pakhatah chuan para 20-na, Sixth Schedule hnuaiia Part I leh Part II hnuai amite hi awl an ni a.

A dang leha chuan Arunachal Pradesh, Manipur, Mizoram, Nagaland leh Tripura, heng state 5 chhunga tribal awmte hi income tax awl kan ni. Helaiiah hian mi thenkhatin tribal area kan nih leh nih loh avang ni ang tein an sawi thin a, a ni lem lova. Tribal area kan nih leh nih loh lam Dan hian a sawi lova. Heng state 5 chhunga cheng tribal te hi Income Tax min awl tawp a ni; Income Tax Act hian.

A dang leha chuan kum 1951-a Assam Governor-in notification a lo tihchhuah in a huamte an ni leh a. A tawp berah chuan Jammu & Kashmir-a Ladakh Region a ni leh a ni. Chungte chu thlamuang takin tun thleng hian kan awm a. Mipuiin income tax kan chawi lova, kan official te pawhin kan ramchhunga an awm na na chuan an chawi lova. Amaherawhchu, tun hnaiah hian Income Tax Act, 1961, Section 194 (A) hnuaiiah hian min rawn rin luh an tum ta a. He Section 194 (A) hi Tax Deduction at Source chungchang sawina a ni a. Hei hi hman atanga awm tawh a ni a, min telh ngai lova. Tun hnaiah hian Ministry of Finance, Govt. of India-in India rama State Bank of India zawng zawngte hnenah notification a pe a, an customer zawng zawng, State Bank-a account hawng zawng zawng te hnen atang khan tribal leh tribal lo thliar tawh si lovin kum khata annual interest ₹10,000/- chin a nih chuan 10% deduct tur a ni an rawn ti ta a. Tin, senior citizen an nih chuan kum khata annual interest ₹ 50,000/- chin tih a ni a. Tin, Pan Card neilo tan chuan 20% an ti baw k a ni. Tuna a lan dan hi chuan Mizo mipui zawng zawng, sorkar hnathawkte nen, State Bank-a account nei ho zawng zawng

hian he income tax hi kan chawi tawh dawn a ni. He order/notification-ah hian tax exemption certificate, Income Tax Office atanga nei theite tan chuan he TDS hi awl theih a ni ang tih hi an ziaik tel tho a. Amaherawhchu, kha exemption certificate kha kum 1 chauh a nung ang tih a ni, kumtin renew a ngai leh dawn ta a. Hei hi min lo phalsak tehreng pawh ni se, he certificate la tur hian State Bank of India-a account nei zawng zawng chu Silchar-ah kan kal vek a ngai dawn a, renew turin kumtin kan kal kan kal a ngai dawn a, thil buaithlak lutuk, mipui tana thil hnawksak a tling tak meuh meuh a ni. Tin, online exemption a tih theih an ti a, chu pawh chu an website atanga online-a tih tur a ni a, chumi ti tur chuan registration nei nih kha a ngai leh ta a, registration buaipui pawh kha a thiamlo kan tam em em dawn a ni. Chuvang chuan he thil hi a hnawk em em ta a, State Bank tan hian engmah hlawkna a awm lo a, an buai a belhchhah ringawt dawn a, he sum hi an ta tur a ni lo a, Ministry of Finance-ah, Government of India-a lut vek tur a ni.

Tichuan, thil awm thei ta chu, State Bank of India-a account neiho hian kan chhuah san ang a, Bank dangah account kan hawng sup sup mai dawn a tih theih ta a. Apex Bank lama hotute pawhin keini chuan kan ti ve dawn lo, kan hnen lamah lo kal rawh u an ti tih te pawh media atangin kan hmu a. Chutianga State Bank kan lo chhuahsan sup sup chuan State Bank of India hi a collapse thei mai dawn si a. Chumi kal zel chuan Bank dang zawng zawng pawh hi lo deduct turin order a rawn siam leh mai ang tih hi a rinawm ta em em mai a, a tu amah kha kan him hi a rinawm chiah lo a ni.

Pu Speaker, hemi chungchanga Minister of State for Finance-in Rajya Sabha-a Rabello-a zawhna a chhanna tawngkam hi ka rawn quote duh a, “gradual phasing out of various exemptions existing in the Income Tax Act hi tuna exemption nei mek ho hi zawi zawia nuai bo kan tum a ni” a ti a ni. Chu an rilru chu a hriat em em ta a ni. Tin, “No of proposal for extending such exemptions to tribals of the rest of the country is under considerations” a ti bawk a ni. Tribal-ten he income tax/chhiah kan awl hi chhunzawm zel kan tum tawh lo va, ngaihtuah mek a ni a ti bawk a ni. Chu chuan tun hnaia thil thlenga kan central sorkar rilru hi a ti chiang ta em em mai a. GST an rawn introduce a, Pan Card neihte chhiah chawi ve si lote hnenah an insist a, sumdawng hote an ti buai em em a, zawi zawiin India Constitution-in min humhimna leh eng eng emaw min pek hi, tuna sorkar mek Delhi ami khuan mi chhuhsak an chak a, an tum mek a ni tih hi a chiang em em a. Cashless

transaction hming chawiin mitinin account an hawng tur a ni an han ti a, a that tur zia an sawi vul chuk a. A hnu lawkah heng account hawng te hian minimum balance/deposit ₹ 3000/- tal englai pawhin an nei tur a ni, chumi an neih loh chuan hrem tur a ni, chawi tir tur a ni an han ti a. Pu Speaker, tunah hian miretheiho ₹ 3000/- balance nei theilo te hnen atanga an hremna tling khawm hi vaibelchhe sing chuang central sorkar hian a chawi tir tawh a ni, mirethei ber berte hetiang hian an hrek mek a ni.

Chuvangin, he thil hi a serious em em mai a, kan sorkar hian a rang thei ang berin thuneitute hnenah hei hi thlen sela, state dang, North East lama sorkar dang te pawh thurualpui ni ta sela, a theih ang angin tang tlang ila, he thil hi sut leh tura theihtawp chhuah turin sorkar hi ka ngen duh a ni, chumi a nih loh chuan kan phek buai dawn tlat mai a.

A tawp bera ka sawi duh chu Pu Speaker, tun hnaiah Citizenship Amendment Bill-te pawh kan buaipui luai luai a. Tuna central-a kan sorkar hrawn mek hian chimral kan nih hi an duh hle niin a lang a, hemi kawngah hian kan inven a ngai a, kan hma lawka inthlanpui lo awm turah hian khutiang sorkar paihthla tura thurual tlang turin i dinglam ami te hi ka han sawm nghal teh ang. Ka lawm e.

SPEAKER : A changtu Minister zahawm tak, kan House Leader ni bawkin sawi tur a neih chuan i lo sawm ang.

Pu ZORAMTHANGA, CHIEF MINISTER : Pu Speaker, member zahawm tak Pu Lalduhoma'n tuna Calling Attention Motion-a a sawi kha ngun taka ena, thil zirchiana, hmalak tul a nih chuan hma lak kha thil tul tak a ni a. Tunhma kha chuan Mizoram te, Arunachal Pradesh te, Nagaland, Tripura, Ladakh Region, Jammu & Kashmir ami Scheduled Tribe-hote chu income tax-te kha awl kan ni a. Amaherawhchu keimahni area ni lo, pawn lama kan awm a nih chuan income tax-te kha chu min tuk thin a, kha kha a kal dan pangngai thin chu a ni a. Mahse tunah order thar emaw, instruction thar emaw awm a, chumiah chuan keini pawhin income tax kan pe tur anga chhawpchhuah ngai chi a nih phawt chuan, hetah hi chuan North East anga kan vaia kan tan tlan a tul khawpin ka hria a. Engpawhnise, North East-a Scheduled Tribe ho in income Tax kan pek hi chu tha lo kan ti tlang vek a. Chuvangin sorkar pawhin kan theihtawpin hma kan lo la ang a, kan zir ang a, kan tih tur tul ang chu chak takin kan lo ti ang tih ka sawi duh a. Tin,

chulovah chuan central sorkar insawichhiat siakah kha chuan a then chuan sawichhiat kan duh khawp ang a, a thenin kan tan duh bawk ang a, khalam kha chu party tinin kan ngaihtuahnaah awm sela, khulama ding lai paih duh an awm ang a, paih duh lo pawh an awm ang a, engpawhnise, keini chu kan hriat ang khan MNF, Mizo nationalist kan nih avangin kan dinna kha chu kan chiangsa ran mai a. Amaherawhchu, khutah khuan Congress Group zawm duh leh BJP Group, NDA leh UPA inthen group karah khuan tute nge zawm a, tute nge la zawm lo tihte erawh chu kan hriat tlan vek kha maw. Heta thil danga ti ta lo ni awm taka in sawi vak erawh kha chu a dik vak bik lem lo ve ka ti a nih chu.

SPEAKER : A lawmawm e. (Interruption) Hei hi kan danin inhnial nan leh sawiho atan a phal lo a. Chuvang chuan, Motion putuin a rawn pulut a, a changtu Minister-in sawifiah ngai nia a hriat a sawi a, he thil hi a pawimawh a, a lawmawm a. Khami kha chu kan duh tawk ang. Business dangah kan kal nghal mai dawn nia.

Tunah Laying of Papers kan buatsaih ang a. Vawiinah hian Paper lay tur 4 kan nei a. A hmasa berin Chief Minister zahawm tak, House Leader ni bawkin ‘A copy of the Report of the Comptroller and Auditor General of India on Social, General, Economic and Revenue Sectors for the year ended 31 March 2017 hi House dawhkanah rawn lay se, i lo sawm ang.

Pu ZORAMTHANGA, CHIEF MINISTER : Pu Speaker, ka lawm e. I phalna leh House remtihain he House-ah hian ‘A copy of the Report of the Comptroller and Auditor General of India on Social, General, Economic and Revenue Sectors for the year ended 31st March, 2017’ hi ka rawn lay e. Ka lawm e.

SPEAKER : A copy kha sem ni se.

Kan zawh chuan pahnihnaah Pu Lalchamliana, Minister zahawm takin ‘A copy of the Mizoram Village Defence Organization (Amendment) Rules, 2017’ hi House dawhkanah rawn lay rawh se, i lo sawm ang.

Pu LALCHAMLIANA, MINISTER : Pu Speaker, ka lawm e. I phalna leh he House zahawm tak remtihain ‘A copy of the Mizoram Village

Defence Organization (Amendment) Rules, 2017' chu House table-ah hian ka rawn lay e. Ka lawm e.

SPEAKER : A copy kha sem ni se.

Pu R. Lalzirliana, Minister zahawm takin 'A copy of the 9th Annual Report, 2016-2017 of Joint Electricity Regulatory Commission for Manipur and Mizoram, Aizawl' tih hi rawn lay ve rawh se, i lo sawm ang.

Pu R.LALZIRLIANA, MINISTER : Pu Speaker, i remtihna leh he House phalnain 'A copy of the 9th Annual Report, 2016-2017 of Joint Electricity Regulatory Commission for Manipur and Mizoram, Aizawl' tih chu House zahawm tak table-ah hian ka rawn pharh e.

SPEAKER : A copy kha rawn sem rawh u le.

Tunah Pu T.J.Lalnuntluanga, Minister of state zahawm tak 'A copy of The Mizoram Lokayukta Rules, 2016' hi House dawhkanah lay turin i lo sawm ang.

Pu T.J. LALNUNTLUANGA, MINISTER : Pu Speaker, ka lawm e. I remtihna leh phalnain 'A copy of The Mizoram Lokayukta Rules, 2016' hi he House zahawm tak ah hian ka rawn pharh e. Ka lawm e.

SPEAKER : A copy kha sem ni leh se.

A dangah kal leh ang. Motion for election to Financial Committees. Kan hriat angin Assembly hian Financial Committees pawimawh tak tak kan nei a. Chu chu Pu T.J.Lalnuntluanga, Minister of state zahawm tak, Parliamentary Affairs Department changtu hnen atangin 'Election to Financial Committees' motion move dilna kan dawng a, tunah move turin i lo sawm ang.

Pu T.J. LALNUNTLUANGA, MINISTER : Pu Speaker, ka lawm e. Mizoram Legislative Assembly-a Financial Committees hrang hrang 4 te, Public Accounts Committee, Committee on Local Fund Accounts, Committee on Estimates leh Committee on Public Undertakings siam a nih theihna tura motion chu hetiang hi a ni e. 'That the members of this House, do proceed to elect in the manner required by under sub rule (1) of Rule 202 read with Rules 250, 250 (b), 252 and 254 of the Rules of Procedure and Conduct of Business

in the Mizoram Legislative Assembly to serve as Members of Public Accounts Committee, Committee on Local Fund Accounts, Committee on Estimates and Committee on Public Undertakings, Mizoram Legislative Assembly for a period of thirty months. Ka lawm e.

SPEAKER : Aw le, Parliamentary Affairs Department Minister zahawm takin dan ang thlapin motion a rawn move a. Kan dan ah chuan inthlan tur a ni a, kan hriat tlan angin. Amaherawhchu hun hmasa lamah te pawh khan inthlang lovin nomination te insiamremin an ti a, concensus ang deuh in, nomination te siam ve thlap tur a ni a. Khatiang khan insiamrem leh mai a tha mai lawm ni kan ti deuh a.

Group hrang hrang leh Legislature party hrang hrang te khan an rawn thehlu ang a. Tin, last date of nomination hi dan anga kan han siamnaah ni 14/03/2019 tlai dar 3:00 pm, naktuk thlang a ni ang a. Tichuan Financial Committee hrang hrang member turte nomination an siamah rawn tihfel mai ni se, a tha kan ti mai em?

Inthlan bur bura tih kha ngailo turah ngai ang aw. A lawmawm e. A nih chuan, nomination paper hi Commissioner & Secretary office-ah lam theih nghal a ni. Tichuan kha chu kan zo leh ta mai ah ngai ila. Tun kan Assembly-ah hian discussion kan neih hmasak ber tur a ni dawn a, discussion on motion of thanks. Tunah chuan nimina Governor thusawi chungchang motion of thanks member zahawm tak Pu F. Lalnunmawia'n a rawn move tak kha kan sawiho dawn a ni.

Hun hi minute engzatnge kan in pek ang le, minute 5 nge ni ang? Tin. tlai dar 4 velah chuan zawh tum ila, vawiina zawh ngei tur a nih kha. Minute 5 nge ni ang, minute sawm, member-te ngaih dan dan le. Minute 5 in duh tawk em? Kan ti mai dawn em ni? Group Leader-te kha kan pe tam deuh dawn a nih kha, he House Leader leh Group leader-te kha, a nih minute 5 i ti ang aw. Motion move -tu member zahawm tak Pu F. Lalnunmawia khan han sawi hawng sela i lo sawm ang u.

Dr. F. LALNUNMAWIA : Pu Speaker, ka lawm e. Mizoram Governor zahawm takin nimina House-a address-naa a thusawi chungchangah lawmthu han sawi belh ka duh a. Governor zahawm tak khan hruaitu tha leh vision tha leh a sorkar hmalakna hnuaiyah Mizoram hi ram

hmasawn, state hmasawn, India ram state zinga hmasawn ber zing ami a nih a beisei thu a tarlan kha Pu Speaker, lawmawm hlein ka hria a ni. Tin, Pu Speaker, kan Governor zahawm tak khan he sorkar tha din tura mipuite tawngtaina chhanna sorkar tha tak kan neih chungah lawmthu a rawn sawiah khan lawmna tur tur tam tak a awmin ka hria. He sorkar tha tak hnuaiyah hian intodelhna chungchangah leh infrastructure chungchangah te sorkar hian hma a la dawn a ni tih a sawi kha a lawmawm hlein ka hria a. Tin, thalaite tihhmasawna kawngah leh entrepreneurship development chungchanga sorkar hmalakna tur a sawite kha a lawmawm hlein ka hria. Governor zahawm tak thusawiah hian Pu Speaker, Mizoram mipui tan beiseina thar min siam sak dawnin ka hria a ni.

Tin, Pu Speaker, Governor zahawm takin he sorkar thar flagship programme, socio-economic development policy chungchang, SEDP chungchang aman a rawn sawi a, he SEDP hmang hian kan state tih hmasawna tur ei leh bar zawna kawngah te, infrastructure dinna kawngah te, hmasawna kawng hrang hranga hmalakna tur a rawn sawite kha Pu Speaker, lawmawm hlein ka hria a ni. Tin, kan Governor tarlan ang khan SEDP hi hlawm thumin, component thumin then a ni a, chungah chuan political & administrative policy te, economic development policy leh social development policy-te a awm a. Heng hlawm thum hmang hian kan ram hi kaihhruai tum a nih tur thu Governor zahawm takin a rawn sawi kha a lawmawm hlein ka hria a ni. Tin, Pu Speaker, he SEDP kalpui tur hian Apex body din thuai tum a nih thu Governor zahawm tak khan a rawn sawi a. Tin, state hrang hrang leh sector hrang hranga hma la turin committee 14 din a nih thu kha lawmawm hlein ka hria a. Heng committee hrang hrang hmang hian nasa takin hmasawna kan kalpui dawn niin a lang a, a lawmawmin a thlamuan thlak hle a, Governor thusawiah hian lawmna tur hliir a awmin ka hria a ni.

Tin, Governor thusawiah hian heng SEDP kalpuina turah hian tanpuina sumte hi tawngpawng sem ringawt tur a ni lo tih a rawn sawi kha thain ka hria a, hmasawnpui theih ngei turin project base-in thingtlang mite khaihchhuah ngei theihna tura he policy/programme hi kalpui a nih tur thu a rawn sawi kha lawmawm tak zetin ka hria a ni. He SEDP hmang hian mirethei leh harsa ten lei rem an rap ve ngei ang tih

kan beisei a, Governor-in SEDP chungchang a rawn sawiah khan lawmna tur tam tak awmin ka hria, ka lawm tak zet a ni.

Pu Speaker, Governor zahawm takin police thuam that chungchang a rawn sawi kha lawmawmin ka hria a. Tunlai ralthuam leh hmanraw tha zawk hmanga kan police thuam that te; ramri venhim chungchangah nasa zawka hma lakte leh ramria chengte tih hmasawna tura sorkarin hmalak a tum thute a rawn sawi kha a thlamuanthlak hlein ka hria a ni. Tin, Pu Speaker, he sorkar hmalakna turah hian a rama chengte hum leh hmasawna bakah Mizoram Household Register kalpui chhoh tum a nih thu a rawn sawite kha lawmawm hlein ka hria a ni.

Tin, Pu Speaker, Governor zahawm takin a rawn sawi zingah Mizo mipuite bengverh leh ngaihven Aizawl khawpui laili atanga Assam Rifle-te Zokhawsang a sawn chhuah an nih tur thu a rawn sawi chhuah kha lawmawm hlein ka hria a, 31st May, 2019-ah chuan an insawn fel tawh tur thu a rawn sawi a nih kha, hei hi mitin te kan lawmin ka hria a, a bik takin Aizawla chengte bakah Mizo mipui mitinte kan lawmin ka hria a ni. Mizoram a bik takin Aizawl khawpui chuan bung thar hmasawna rahbi thar, kan kai dawnin ka hria a. Tin, an chhuahsan hmunte a tangkai thei ang bera mipuite tana cheibawl a nih tur thu Governor zahawm takin a rawn sawi kha a lawmawm tak zet in ka hria a ni.

Pu Speaker, Governor zahawm takin Agriculture chungchang rawn tarlangin Mizo mipui tam zawkte inngahna hi Agriculture a nih laiin kan sum thawhchhuah erawh chu kan GSDP-ah 30% chauh Agriculture hian a thawkhhuak a ni tih kha ngaihtuah ngun a tul hlein ka hria. Hemi kawngah hian Governor sawi ang khan he sorkar thar hiannasa takin ngaihtuahna a seng chho dawn a. Tin, Agriculture leh akaihhnawih Horticulture-te, AH & Veterinary-te leh Fishery leh a dang dangah kan sorkar-in hma lak chhoh a tum thu Governor zahawm takin a rawn sawi kha lawmawm hlein ka hria a. Tunlai thiamna tharlam zawkte hmanga thlai chin dan te, ei leh bar zawna te kalpui tum a nih thu a rawn sawite kha a lawmawm hlein ka hria. He sorkar tharin a ngaihpawimawh em em kan ei leh bar zawna kawng link road tam zawk siam a nih tur thu a rawn sawi te kha lawmawmin ka hria a. Tin, organic farming pawh uar zawka kalpui a nih tur thu leh thlai chinna leh ei zawna kawng hrang hrangah

kut hnathawktu, farmer-te training tha zawk pek an nih tur thu te; tin capacity building lamah nasa zawka tan lak a nih tur thu Governor zahawm takin a rawn sawi kha Pu Speaker, a lawmawm tak zetin ka hria a ni.

Pu Speaker, Governor zahawm tak khan hmasawna ruhrel, infrastructure dinna kawngah nasa taka tan lak a nih tur thu kha a rawn sawi a, a bik takin kawngpui siamthat chungchangah nasa taka hma lak a nih tur thu kha a rawn sawi a. Tin, kan thenawm state-te nen inkal pawhna kawng siam a nih tur thu te, kan kawng neihsa nasa taka cheithat tum leh cheithat mek a nih thu a rawn sawi te kha Pu Speaker, lawmawm hlein ka hria a ni. Tin, tun sorkar kal mekah hian bridge thar 27 lai kalpui mek a nih thu Governor khan a rawn sawi bawk a, sorkar building 62 a thar sak mek a nih thu a rawn sawi bawk a ni, khangte kha a lawmawm hlein ka hria. Tin, khawpui chhung cheithatna kawngah nasa takin sorkarin hma lak a tum thu a rawn sawi a, chung zingah chuan kan harsatna lian tak mai Pu Speaker, traffic jam tihziaawm a nih theihna turin, a bik takin Aizawl khawpui hmalakna a rawn tarlang a. Chung zingah chuan Parking House Support Scheme (PAHOSS), scheme thar kan Chief Minister zahawm tak ngaituahna a rawn duan chhuah a ni ta hi a lawmawm tak zetin ka hria a. Governor-in he thu a rawn sawi chhuak hi Pu Speaker, a lawmawm tak zetin kak hria a ni.

Tin, Aizawl khawpui smart city-a cheibawl a nih tur thu a rawn sawi kha a alawmawm hle in ka hria a. Pu Speaker, chutihruah chuan Aizawl khawpui chauh ni lo, Aizawl pawnlam khawpui dangte leh thingtlang hmun dang tih hmasawn hi sorkarin a ngaipawimawh hle dawn a ni tih Governor zahawm takin a ran sawi kha a lawmawm tak zetin ka hria a ni.

Pu Speaker, Governor zahawm tak khan Power and Energy chungchang a rawn sawiah khan mipuite hnena eng hnianghnar zawk pek tur a nih thu a rawn sawi a. Tin, a thusawiah khan thil lawmawm deuh chu, Mizoram hi Saubhagya Scheme hnuaiah a titha, a tizo hmasa ber zing ami a ni kha a lawmawm hle in ka hria a. He scheme hnuaiah hian miharsate in 25755 lai eng pek a nih thu a rawn sawi kha a lawmawm hlein ka hria a.

Pu Speaker, he sorkar hmalaknaah hian Kau-Tlabung hydel project siam leh thawh mek leh Thenhlum nena a inkara 33 KV line thlun a ni te; tin,

Mamit-a 132 KV sub-station siam leh Zawlnuam nena a inthlun pawhna hna thawh a nih thu a rawn sawite kha a lawmawm hlein ka hria a. He sorkar thar hnuaiah hian Power & Energy-ah pawh hian nasa takin hma kan sawn ang a, kan indaihlohnate pawh phuhruk chhoh zel a ni ngei ang tih ka ring a ni.

Pu Speaker, Governor zahawm tak khan tui thianghlim mipuite tan hnianghnar zawka pek a nih tur thu a rawn sawi kha a lawmawm hlein ka hria a. Mizoram hmun tam takah tui indaihlohna a la nasa hle a, hengah hian nasa takin sorkarin tan a la dawn a ni tih Governor zahawm takin a rawn sawi kha a thlamuanthlakin ka hria. Tin, kum 2018 leh 2019 chhung khan in 4235-ah tui connection pek a nih thu a sawite kha a lawmawm a. Tin, Pu Speaker, thil lawmawm tak mai chu Governor zahawm takin Mizoram hi India rama state fai ber ni tura hma lak a nih tur thu a rawn sawi kha a lawmawm tak zetin ka hria a. Hetah hian sorkar tharin nasa takin, theihtawpin hma a la chho turah pawh ka ngai a ni. Tin, Mizoram hi Open Defecation Free state-a puan a nih thu a sawi te pawh kha thil lawmawm tak, hmasawna rahbi lawmawm tak a niin ka hria a ni, Pu Speaker.

Pu Speaker, Governor zahawm tak khan zirna tihhmasawna kawnga sorkar hmalakna leh hmalak mekna tur te, hmalak chhohna tur te a rawn sawi a. Chung zingah chuan vawiina sawi chhuah chakawm tak mai chu Pu Speaker, mi tam takin an nghahhleth, school timing siamthat chungchang kha a ni a. He sorkar hian mipuite duh angin academic session thar atangin Mizote khawsakzia leh kan nunphung mila school timing her rem a tum a ni tih kha a rawn sawi chhuak a, a lawmawm hlein ka hria a ni.

Pu Speaker, nimina Governor zahawm tak thusawiah khan zirtirtu semrual a nih theih nan hma lak tum a nih thu te; tin, school zirna hmunah infrastructure tha zawk pek a nih tur thu a rawn sawite kha a lawmawm ka ti a. Tin, private school leh kohhran enkawl school-te, Government Aided school hote nasa zawka chhawmdawl an nih tur thu Governor zahawm takin a rawn sawi kha a lawmawm hlein ka hria a. Heng school-a thawkte leh school naupangte hamthatna tam zawk pek an nih tur thu a rawn sawi kha Pu Speaker, a lawmawm tak zetin ka hria a ni.

Tin, hmasawna rahbi thar pakhat sawilan chakawm em em chu Pu Speaker, Mizoram chhimlam Pukpui khuaa Engineering College sak zawha hawn mai tur leh class tan mai tura peih a ni ta hi a lawmawm hlein ka hria a.

Chu chu hmasawna rahbi pawimawh tak a ni awm e.Tin, Pu Speaker, Mizorama kan college 4 te hi Model Degree College-a hlan a nih tur thu Governor zahawm takin a rawn sawi kha a lawmawm tak zetin ka hria a ni.

Tin, mipui vantlang hriselna chungchanga Governor thusawi kha a lawmawm tak zetin ka hria a. Pu Speaker, health care tha zawk leh Health Care Scheme changtlung leh chhawmahawm zawk ruahman a nih thu Governor zahawm takin a rawn sawi kha a lawmawm hlein ka hria a. He sorkar thar hnuaiyah hian mirethei zawk leh chhumchhia ten an chhawr tangkai theih tur Health Care Scheme tha zawk hman a nih tur thu a rawn sawi kha a bik takin mirethei leh harsa, thingtlang mipuite pawh an lawm ve ngeiin ka ring a ni.

Pu Speaker, Governor zahawm takin environment humhalh chungchangah nasa zawk leh mumal zawka hma lak tum a nih thu a rawn sawi kha a lawmawm hlein ka hria a. Kan ei leh bar tih hmasawna, economic growth leh development kan kalpui ruala environment tichhelo zawng leh humhalh zawnga hma lak tum a nih thu a rawn sawi kha Pu Speaker, a lawmawm tak zetin ka hria a ni.

Tin, Pu Speaker, he sorkar tharin a ngaihpawimawh em em, a ngaihpawimawh ber zing ami, mau hmanga eizawna ngelnghet siam a nih tur thu, hemi lama nasa taka hma lak a nih tur thu Governor zahawm takin a rawn sawi kha a lawmawm hlein ka hria a. Mau ngah state kan ni a, chutihruah chuan mau tha zawk leh lian zawk ching tura hma lak a ni dawn a ni tih a rawn sawi kha a lawmawm hlein ka hria.

National Bamboo Mission hnuaiyah raw lian chi, mau tha leh tangkai thei zawk tur nasa zawka chin uar tum a nih thu a rawn sawi kha Pu Speaker, a lawmawm hlein ka hria a ni. Tin, bamboo processing technology tha zawkte a lo chhuak mek a, heng thiamna tha zawk hmanga kan mau neihsa te leh mau hmanga eizawna, thil siamchhuah tha zawk kan neih thuai kan beisei a.

Thenkhatten mau chungchang hi fiamthu thawh nan te pawh an lo hmang a ni mai thei, mahse Pu Speaker, he sorkar term chungah hian mau thatzia leh mau hmanga eizawna tha a lo neih theihzia kha a lo lang ngeiin ka ring a ni.

Pu Speaker, Governor zahawm takin nimina a rawn sawiah khan thalaite tan eizawna leh an rahbi tuk sak tum a nih thu a rawn sawi kha a lawmawm in ka hria a. Entrepreneurship leh self employment chungchanga sorkar thar hmalakna tur a lo sawi kha a lawmawm hlein ka hria a. Kan ram thalai hna neilo leh hnathawh tur neilo, lekhathiam si tam tak beidawnga awm mekte dawmkang tura hma lak a nih tur thu Governor zahawm takin a rawn sawi kha a lawmawm tak zetin ka hria a. Mizoram thalaite tan hei hi thu lawmawm a tlingin ka hria a ni.

Tin, Act East Policy leh border trade lamah nasa zawka hma lak a nih tur thu Governor zahawm takin a rawn sawi kha a lawmawm hlein ka hria a. Sumdawna kawngah te leh hmasawna kawng hrang hrangah he Act East Policy leh border trade hmang hian nasa takin hma kan sawn ngei ang tih ka ring a ni.

Pu Speaker, Governor zahawm tak rawn tarlan zingah khan Tourism tihhmasawna kha a rawn tarlang a. Chung zinga a rawn sawi bengverh deuh mai chu rural tourism kha a ni a. Thingtlangmite nen tangruala Tourism tih hmasawn a nih tur thu a rawn sawi kha a lawmawm hlein ka hria a. Tin, State Institute of Hotel Management dina hawn thuai a nih tur thu a rawn sawi kha a lawmawm tak zet a. Helama tuimite tan chuan chanchinthar lawmawm tak a niin ka hria a ni.

Tin, Pu Speaker, Sports lam tihhmasawn chungchang Governor-in a rawn sawi a, nasa takin infiamna lamah hma lak a nih tur thu a rawn sawi kha lawmawmin ka hria a. Sports Minister leh Tourism Minister hetiang lam ti mi tak kan nei te hi a lawmawmin ka hria. Governor sawi ang khan helamah hian sorkarin hma a han la tak tak ang a, nasa takin thalai te tan pawh kawl a eng ngei ang tih Pu Speaker, ka ringin ka beisei tlat a ni.

Tin, he sorkarin a tum pawimawh tak zing ami Governor zahawm takin a rawn tarlan zingah Mizo nunphung leh ziarang, nundan mawi chawisan a nih theih nan kawng hrang hranga hma lak a nih tur thu a rawn sawi kha a lawmawm tak zetin ka hria. Tin, India ram mai bakah khawvel hmun hrang hrangah Mizo leh Zofate inpumkhatna tura sorkarin hma lak a tum thu a rawn sawi te kha a lawmawm tak zetin ka hria a ni. Tin, tunlai thiamna, Information and Communication Technology hmanga

sorkarin hma lak a tum dan Governor zahawm takin a rawn tarlan kha a lawmawm hlein ka hria a. Mizoram Telecom Infrastructure Policy, 2019 duan mek a nih thu a rawn tarlan te kha a lawmawmin ka hre hle bawk. Tin, Mizoram sorkar office kalphung leh mipui nena kan indawrna kawngah nasa zawka communication technology hman a nih tur thu a rawn sawi kha lawmawm hlein ka hre bawk a ni.

Pu Speaker, Governor zahawm takin a rawn tarlan zinga a component, a peng pawimawh em em mai a rawn tarlan zing ami Social Development chungchang a rawn sawi kha han tuihnih hlek ka duh a. Tah hian vantlang nunphung, nundan tha zawk, khawtlang nun chawikan nan kawng hrang hranga hma lak a nih tur thu a rawn sawi kha lawmawm hlein ka hria a. A bik takin khawtlang/vantlanga mirethei zawkte tan hamthatna tam zawk siam a nih tur thu a rawn sawi kha a thlamuanthlak hlein ka hria a. Chung zingah chuan khawtlang nun siamthatna kawnga sorkarin a ngaih pawimawh em em chu zu leh ruihhlo nasa zawka do a ni tih a rawn sawi kha a lawmawm hlein ka hria a ni. A bik takin zu zawrh tihtawpna tur Dan siam a nih tur thu leh tun session chung ngeia he Dan hi pass a nih tur thu a sawi kha a lawmawm tak zetin ka hria a. Helaihan kohhran te, NGO te leh Zoram mipui kan lawm in ka hria a, kan khawtlang nunin a that phah ngei ang tih ka ring a ni. Kohhran leh mipui support pawh he sorkar thar hian a hlawh viauin ka hria a ni.

Hetih rual hian kan Governor-in hmeichhia leh naupangte tihhmasawn leh hmeichhia leh naupang hmanga sumdawna lam dona nasa zawka kalpui a tum thu a rawn sawi kha lawmawm hlein ka hre bawk a. Tin, a rawn tarlan zingah rasion buhfai leh thil dang, mipuiin kan mamawh te hnianghnar zawk leh rualkhai zawka sem a nih tur thu a rawn sawi kha a lawmawm ka ti a. Heng kan mamawh thilte a quality a that leh that loh endikna tur hmun Mizoram hmun hrang hranga din a nih tur thu a rawn sawi te kha a lawmawm hlein ka hria a ni. Heng hmang hian kan buhfai dawn te, chini dawn te leh thil dang te a quality a that phah ngei ka beisei tlat a ni.

Pu Speaker, Mizoramin kan sumhnar pawimawh tak chu chhiah tlingkhawm hi a ni tih Governor zahawm takin a rawn sawi kha a pawimawh hlein ka hria a. Kan state sorkara sum lut a pung hret hret a,

chutihrualin state revenue pawh hi tihpun zel a tul thu a sawi kha a lawmawm hlein ka hria a, ngaihtuah zui zel atan pawh a pawimawhin ka hria a ni.

Aw le, Pu Speaker, Governor zahawm takin kan sorkar thar Pu Zoramthanga kaihhruai sorkarin hmalak a tum dan, policy leh programme tlangpui a rawn sawi te kha a lawmawm tak zet a. Hemi ruahmanna hmang hian Mizoram chuan nasa takin hma a sawn ang tih ka ring a. Mi beidawngte tan pawh beiseina thar kawl a lo eng in ka hria a, hengah hian kan sorkar hi theih ang tawka tawiawm turin ka insawm a ni. Governor zahawm tak thusawite hi Pu Speaker, a lawmawm tak zet in ka hria a, he sorkar hnuai hian Mizoram hian hmasawmna leh bung thar a chuangkai ngei ang tih ka ring tlat a ni. Pu Speaker, chu chu ka sawi theih ni mai rawh se. Ka lawm e.

SPEAKER : Sawiho duh tan kan hawng ang a. Pu Zodintluanga, ani hi 10 minutes kan pe ang a, midang kha minutes 5.

Pu ZODINTLUANGA RALTE : Pu Speaker, ka lawm e. Vawiinah he House zahawm taka kan Governor thusawi sawiho thei tura ka rawn ding chhuak thei hi ka lawm a, lawmthu ka rawn sawi duh a. A thusawi tlangpui kha Mover-in a rawn moved ang khan, lawmthu sawina tur tam tak a awmin ka hria a. Amaherawhchu, Mover-in a rawn sawi zing ami tam tak kha tun sorkarin a tih ang a rawn sawi kha chu a hriatchian loh vang a niawm mang e aw, ka ti a.

Pu Speaker, a hmasain budget session kan han nei hi Vote on Account mai a ni a, heta tang ringawt pawh hian kan sorkar kal tum dan hi chu a lang uarin ka hre mai a. Hun hmasaah te kha chuan Planning Commission-in kan plan te a rawn final hmain full budget te hi kan nei thei lo thin a ni a. Tunah chuan Finance Commission-in kan pawisa hmuh tur te engkim ruahman lawkin a rawn nei tawh a, chuvang chuan full budget neitu Finance lam te pawh an inpeih tawh tih thawm te han hriat pheh hi chuan kan sorkar hian hmasawmna lamah hian tan hi a la tak tak duh lo em maw ni le! Two wheeler taxi-a chuan te, taxi-a office kal mai mai te hi nuam an tih tawk em ni dawn le, tih hi kan ngaihdan a ni tlat mai a. A chhan chu Pu Speaker, tun atanga thla li vel, July emaw ah full budget session kan tan dawn a, chutah chuan sorkar hmalakna, sorkarin a tum dan leh sorkar project te a la kal dawn chauh a ni. Vawiina kan budget

pass-ah hi chuan thil ropui tak a awm dawn lo. Chuvangin thla ruk hi chu Congress sorkar hmasain pawisa a lo dah tawh sa hman kha a ni ringawt mai dawn a ni, Pu Speaker. Chuvang chuan sorkar hi he ram siamthat nan a tir atang hian an va serious lo ve maw le tih hi mi ngaihdante pawh a ni.

Tin, Governor zahawm takin hmasawna tam tak a rawn sawi te hi a lawmawm ka ti tak zet a. Assam Rifle sawn chhuah tur chungchang a rawn sawi te hi sawn chhuak thei tur chuan a hmain thil tam tak tih lawk a ngai a, thlakhat chhunga chhuak mai thei an ni lo, hemi chhuak thei tur hian kawng te siam a ngai a, tui in tur ruahman te a ngai a, building te sak a ngai a ni. Khatiang zawng zawng titu kha an awm a ni tih hi vawiinah hian rawn sawi chhuah hi tulin ka hria a. Tin, sorkar hmasain thingtlang lo neimite tana a hmalak tawh an rawn report te hi, link road 786 kms lai an han lai zo thei te hi Pu Speaker, a lawmawm ka ti a, sorkar hmasa hmalakna ropui tak a rawn tarlang te hi a lawmawm hlein ka hria.

Tin, nichinah khan Mover-in, ‘tun sorkar thiltih ropui’ a rawn tih kha tih hman niin ka hre lova, sorkar hmasa khan 86 kms kawng thar an lai a, blacktop hmun 20 ah, 139 kms an laih te, leilawn pali an siam te, chutiangin kawng thar ruahmanna tur vaibelchhe tam tak an rawn siamte leh building 83 zinga 21 an complete tawh te, 62 siamte a rawn sawi hian Pu Speaker, sorkar hmasa khan nasa takin hna a thawk a ni tih a tichiang em em a.

Tin, Aizawl khawpui chhung kawng zauhna Vaivakawn junction te, Bawngkawn junction te mipui tana hman tangkaina tur a rawn sawi te hi lawmawm ka ti a. Chumi piah lamah chuan an rawn sawi hmai Pang Peng, Pu Speaker, nangma veng, i haw kawng ngei ami Pang Peng nuam taka siam te saw rawn sawi tel thei se chuan a lawmawm leh zual tur a nia.

Tin, thla hnih chhung leka in 25,755 tih-en ang te kha chu Pu Speaker, thil theihloh niin ka hria a, hei hi sorkar hmasa atanga an lo kalpui tawh/hmalak a ni a, a lawmawm ka ti tak tak a. Vawiinah India ramah pawh open defecation free kan han ni thei a, hetiang faina lama hmasawna te pawh hi a lawmawm ka ti a, Pu Speaker, Governor thusawi tawhah chuan tuna a sawi hi lawmna tur tam berna niin ka hria.

Tin, Lunglei lamah khan Mizoram Engineering College, Mizoram ramin kan mamawh em em, keimahni puala kan nula/tlangval ten Engineering College, Pukpui ami hman theih mai tura India ram Prime Minister meuhin a rawn hawn theiha zawh tawh te khan Congress sorkar hmasa hmalakna, hna a lo thawh tam tawh zia te hi a rawn tilang chiang hlein ka hria a.

Tin, Aizawl khawpui chhung tihhmasawna tura Smart City Mission atana vaibelchhe 500 rawn kal mai tur te hi a lawmawm ka ti a, henge hi competition, nasa taka inelna kar atanga neih chhuah a ni a. Hengah hian hmasawna tur tam tak Governor-in a rawn sawi zingah hian kawng chhawng kan siam dan tur a rawn sawilo hi chu a paw ka ti hle a, mipuiin kan lo nghahhlelh em em a ni si a.

Tin, Pu Speaker, India rama Entrepreneurship state zinga a ti tha ber kan ni te hian thalaite tana sorkar hmasain hma a lo lak thin te, infiamna lama India ram pum puiah 16-na kan han kai chho te hi a lawmawm ka ti tak tak a.

A tawp ber atan chuan Pu Speaker, SEDP an rawn sawi ah khan kan lo beisei em em mai chhungkaw tina nuai 3 sem tur leh, NLUP dawng tawh zawng zawng pawhin an dawn leh tur ang chi te vawiina Governor thusawia a rawn tello hi chu a paw ka ti a. Amaherawhchu Pu Speaker, member zahawm tak tak nakina rawn sawi tur te pawhin heng sorkarin kan ram tana hmasawna tur tam tak a tih hi sorkar hmasa atanga rawn kal a ni tih hi an hriat nawn atan ka rawn sawi duh a. Tin, lawmthu sawina hi Pu Speaker, a move-tu member zahawm tak kha ka rawn thlawp baw a ni e. Ka lawm e.

SPEAKER : Member zahawm tak Pu Laltanpuia i lo sawm ang.

Dr. VANLALTANPUIA : Pu Speaker, nimina kan Governor zahawm takin he House zahawm taka a thusawite kha lawmawm hlein ka hria a, han tuihnih ve ka duh a.

Kan hriat theuh angin December ni 18-ah khan session hmasa kan nei a, ni 18-ah khan he House hi kan Governor khan a address a ni a. Tichuan, Motion kan putlul khan kan sorkar kha a ding tir a nih

avangin achievements, thil tihlawhtlinte engmah a la awm hleithei lova. Amaherawhchu, kan sorkar hi thla hnih/thla thum chauh a la ding a. Vawiina session kan han neih leh tak, Eighth Mizoram Legislative Assembly, Second Session thla hnih hnu vel chauha kan neih ah hian kan Governor Speech-ah khan achievements tam tak a rawn lang nghal hi a lawmawm ka ti a. Tin, a thusawi tlangpuiah khan achievements te, policy and programme te leh visions te a ni a. Chung zinga achievement hmasa berah chuan kan ngaihthlak tak ang khan kan Chief Minister zahawm tak Pu Zoramthanga kaihhruai sorkarin khawpui laili atanga kan kumkhaw mutan Assam Rifles Battalion sawn chhuah a ni tur te a rawn lang ta. A dawt lehah chuan kan sorkar hmahlir pawimawh tak SEDP-ah hian thil hrang hrang a rawn sawi chhuak kha a lawmawm ka ti a, chung zingah chuan key growth sector kan than theihna tur sector-te identify a, chumi atanga kan ram chawikanna tur programme kan launch te a rawn sawi kha lawmawm ka ti a. Chung zingah chuan kan ramin resource kan neih hausakna te, theihna te kan neih ho zingah land resources-a pawimawh ber pakhat address-tu kan siam tur chu Agriculture-te, Horticulture-te, Fisheries-te, Veterinary & Animal Husbandry-te a tul ang anga tunlai thiamna sang ber ber hmanga kalpui kan tum a rawn tarlan te kha lawmawm ka ti a.

Chung bakah chuan kan ramin hausakna a neih pawimawh em em pakhat kan man power development programme sorkarin kalpui a tum te, kan human resources he tawngkam pahnih hi khawinge lian zawk ang aw tih hi inhnialna a ni thin a. Amaherawhchu, he MNF sorkar thar hian kan resources neih pawimawh ber zinga a ngaih, kan human resources hi India ramah hian Education sawina atan te kan lo hman nasat avangte hian a concept, a ngaihtuahna te hi thlak deuhin kan thalai, youth empowerment te leh mihringin kan thiam, kan theih, kan finnte hi tipung tur programme, man power development programme din a nih tur chungchangte, kan human resources, kan sector pawimawh ber pakhat ACDP-in a address tur chungchangte hi a lawmawm ka ti a.

Chung zingah chuan entrepreneurship kan sawi ang khan kan theihna te, capacity building tih kan tum te, fashion designing te, designing chi hrang hranga Mizo te theihna te, nursing lama kan hlawhtlinna tur te, hospitality lamah te, management programme hrang

hrangah te leh professionalization course hrang hrang kan siam tur chungchang te, Sports Promotional Programme te leh designing ka sawi hrang hrang te, Mizo ten kan theihna tur chungchang leh kan economy tipung thei tur programme atan he sorkarin hmahlir leh programme a neih te a rawn tarlang hi lawmawm ka ti a.

Chuvangin, he sorkar chak tak hian hma a la mek a. Governor speech-ah hian chung achievements hrang hrang leh programme tarlan a rawn ni hi a lawmawm ka ti em em a, chu chu ka rawn sawi ve a ni. Pu Speaker, ka lawm e.

SPEAKER : Tunge sawi leh dawn? Pu C. Lalsawivunga; bell a rik khan minute 1 in la nei turah ngai ula.

Pu C. LALSAWIVUNGA : Pu Speaker ka lawm e. Vawiinah hian minute 5 chauh hun kan nei a, induhthawh a na dawn hle mai a.

Ka sawi duh chu Mizoram-ah household register kalpui a nih tur thu Governor speech-a lo lang hi a lawmawm in ka hria a, lawmthu ka sawi a, hei hi hmanhmawh taka tih nghal theih ni sela. Western belt lamah erawh khu chuan fimkhur taka kalpui ni thei sela. Kan ram western belt lamah hian Mizo ni lo, lo lut ru tam tak an awm a, heng lamah erawh hi chuan fimkhur taka kalpui ni sela a duhawm a, kha lai kha ka rawn point out hmasa a.

Hetih rual hian Assam Rifle Aizawl khawpui laili lai tak atanga Zokhawsanga sawn chhuah tur chungchang thute a lo lang a. Engpawh ni sela, hengte pawh hi achievement thar a ni tia kan ngaihtlak ang khan a lawmawm phawt ah ka ngai a. Amaherawhchu, rilrua ngaihtuahna awm Governor speech-a tarlan ni bawk si lo chu Commandant awmna te, Mandir te saw an chhuahsan dawn em tih hi ngaihtuah tham tak a awm a. Chuvang chuan Assam Rifle Headquarter Zokhawsanga sawn chhuah turah hian Commandant awmna zawng zawng te, Mandir te saw an chhuahsan lohva an luah zui zel dawn a nih chuan mipui tan phurrit a la ni zui zel dawn a, kan sorkar hian helai ah hian engangin nge ngaihtuahna a siam? Assam Rifle, te leh kan sorkar hian MoU-ah engtin nge an ziah tih te kha ngaih pawimawh awm hlein ka hria a. Kan House Leader pawh a awm a, ani hmalakna kal zel a nih avangin khang lai te kha min lo chhinchhiah sak sela a duhawm hlein ka hria.

Tin, zirna sikul chungchangah hian Government Aided School te, kohhran leh private school te ngaihpawimawh leh ngaihsak an nih tur chungchang a rawn tarlang te hi a lawmawm in ka hria a. College Vengah hian Science stream zirna kan nei a, an result pawh a tha thin hle a. A bul mai ah Government Higher Secondary School a awm a, hetia private anga kal lo hian kan sorkar hian a dah belh mai thei em tih te kha vawiinah hian ka rawn highlight lo thei lo va. Governor speech-ah a lo lang a, hengte hi keini tan chuan a thlakhlelh awm hle a, a lawmawm pawh ka ti a ni.

Hetih ruala ka han sawi leh duh chu Health Care Scheme chungchang a rawn tarlang a, Scheme changtlung tak, mirethei te tan chhenfakawm taka kalpui a nih tur thu te kan hmu a. Hetih ruala ka sawi duh erawh chu, damdawi lama zirna kan neih awm chhun MIMER chungchang tarlan a awmlo erawh hi chu engatinge aw, kan sorkar hian a theihngihlh palh nge ni ana a ngaihthah tih hi zawhna lian tak a ni lo thei lova. Tunah Medical College kan neih chhun a ni a, Governor speech-a engmah a rawn flash lo hi, tarlan a ni lo hi a pawh hlein ka hria a. Theihngihlh palh nge ni ang ngaihthah vang tih kha ka rilru ah a awm lian khawp mai a.

Chutih rual chuan MIMER Referral Hospital-ah sawn mamawh chi hrang tam tak an nei a, staff te pawhin quarter an indaihlo hle mai a, mi in luahin an awm a. Staff bus te pawh an nei lova; tin, oxygen te pawh saw central line inthlung zui mahse power an neih loh avangin an hman hleithei lova, tui lamah harsatna an tawk a. Khatiang khan harsatna tam tak an tawk a, transformer te pawh dah thar tura ruahman a nih mek lain hman theih lohin a la awm a, khanglai te pawh kha ka rawn tarlang tel ni sela.

Tin, Pu Speaker, climate change leh global warming chungchangah kan ramngaw humhalh a tul zia te, chuta tanga climate change leh global warming-a khawvelin harsatna a tawh mek thu a rawn tarlang a, hei hi ngaihtuahna tak tak kan hman a pawimawhin ka hria a. Chutih rual chuan Pu Speaker, kan sorkarah hian hemi chungchangah hian rawtna siam ka duh a, min lo hrethiam hram la. Environment crisis chi hrang hrang, sik leh sa danglam nasa avang te; tin, mihring siam chhiat rupna (man-made disaster, landslide) avang te, nungchate harsatna bio-diversity avang te, hriselna lama harsatna (health hazard) avang te hian environment humhim leh humhalh a pawimawh a, chutah chuan sorkar leh tlawmngai pawl hmalakna hi a

lawmawm ka ti khawp a. Tichuan, Pu Speaker, kan ramin environment crisis a tawh mek thlir chungin sorkar policy leh hmalakna te; tin, development kal mekte hi environment himna leh hmasawna tluantling, sustainable development ngaih pawimawh a hun ta hle a. Chutah chuan Pu Speaker, kam hnih khat chauh, environment hmasawna kan dawnte him taka hman tangkai hi ram leh sorkar mawhphurhna lian tak a ni a. Hemi kawngah hian environment lam bik zirna college hi siam theih ni sela, hemi kawngah hian kan sorkar hian hma a la thei ang em? A hmun turah pawh Bamboo Ratan Research Centre awm sa a awm a, Forest Training Centre School awmsa a awm bawk a. Heng behchhan hian Environmental Institution te hi din tura hmalak theih a ni ang em tih te kha thahnem ngaih thil thu ah Pu Speaker, ka han sawi zau a ni e. Ka lawm e.

SPEAKER : Tunge sawi leh dawn? Pu K. Pachhunga a phar hmasa zawk e.

Dr. K. PACHHUNGA : Pu Speaker, ka lawm e. Governor-in a sawi sorkar hmalakna te leh hmalakna vision hrang hrangte a zavai hian a ropui ka ti a, a tha ka ti em em a. A bik takin kan hriat tlan vek chu Zoram dung leh vang mipui kan chhuk chho kalna road communication-ah kan hnatlang mup mup a, nimahsela sorkar thar mipuite zarah neiin kan House Leader, kan CM ni bawkin theihtawpin hma a la a, kawngpui te pawh repair niin vawiinah chuan zin veivah te pawh nuam kan ti a, mipui pawh hi kan hlimin ka hria.

Pu Speaker, Governor-in a rawn tarlan pheh 1-na leh pheh 9-naah khan a lang a, bamboo chungchangah Governor hian kan potential dik tak a hria a. Khawvel ram hrang hrang hi kan dam khawchhuah theih nan Pathianin engemaw hi min pe vek a. Thlaler ram ro Middle East te chu Pathianin lei hnuaiah tuialhthei tha tak mai a lo pe a, nimahsela, tuialhthei te pawh kha a sum in a rah nghal ngawt lova, dum bal tak leh ek chhia niawm tak a ni a. Mahse thiamna hmangin technology nen treatment an beih hnu ah petrol-ah te, diesel-ah te, gasoline-ah te changin khawvela ram hausa leh nuam an lo ni a.

Chutiangin Africa ramah te leh India ram hmun hrang hrangah resource an nei tha a, tuialhtheite an lai chhuak a, chinai te, lungalhthei te an lai chhuak a, chu chu hmang tangkaiin ram hmasawna namenloin an kalpui a, keini pawhin kan chhawr a. Mizoramah hian tun dinhmunah chuan rangkachak kan neilo a, lungalhthei pawh laihchhuah tur kan neilo a,

Pathianin min pek awmchhun chu ramngaw hausakna, thing leh mau hi a ni a. Thing pawh kan hmang tangkai a, mau pawh kan hmang tangkai a, mahse mithenkhat ten mau kan ngah em avangin ngaihsan nachang kan hrelo a, fiamthu thawh nan kan hmang a. Mau hi han zirchian chuan, mithiamte leh khawvela ram changkang leh mifingte chuan future development, khawvel hmasawna awmzel turah chuan bamboo technology hi kan inngahna a ni tiin hmun tin ah, seminar-ah te leh University-ah te pawh sawi a ni a. Chu chu mau ah hian Pathianin chakna namenlo a lo dah a, carbon hlang kan ti mai ang chu, nichina member zahawm tak Pu Sawivunga sawi ang deuh khan, kan ram a lo lum zel a, khawvel mamawh chhanna chu carbon dioxide eiral thei tu a ni a, chu chu carbon sink an ti a. Chutah chuan bamboo hian carbon hi a hip tha ber a, the best absorbent kan tih ang chi a ni ta a. Mau ah hian 60% carbon a awm a, carbon hi khawvel mamawh chhanna a ni. Eng nge carbon kan tih chuan petrol hi, diesel oil hi carbon a ni a, chutiingin lungalhthei pawh carbon a ni a, energy hlauhawm awmna chu carbon a ni a. Chuvang chuan mau atangin current a siam theih a, diesel a lak chhuah theih a, kawr, puanthan, engkim a siam theih a. Tin, mau atangin hmanraw chitin reng a siam theih a, chutiang bawkin mau atangin zute pawh a thlawr theih hial a ni.

Chuvang chuan Pathianin mau ah hian chakna namenlo carbon 60% leh starch 40% a lo dah a. Chuvangin kan House Leader, kan Chief Minister ni bawkin mau vision hi a nuihzathlak loh a, a ropui a, Mizo fate dam khawchhuahna tur a ni in ka hria a. SEDP te nen kan kalkawp a nih chuan mau hmang te pawhin kan tu leh fate, kan thalai te pawhin eizawna tam tak neiin Mizo te hi kan lo zahawm ang a, kan retheih ka ring lo a ni.

Chutiang chuan Pu Speaker, bamboo chungchangah hian sawi tur tam tak a awm a, kan sawi senglo ang a. Tin, Bamboo Mission hmangin hmalak tum te pawh a ni a, Committee-te hial a lo din hi a ropui ka ti a. Tin, Health Care-ah ziah lan sen loh a ni maithei, kan sorkar tharin thisen man mirethei ten an thih dawna loh theih loha thisen unit 1 ₹ 550-a lei ngai te kan han titawp te hi a ropui ka tiin mirethei te sorkar a tling tak zetin ka hria a.

Tin, Assam Rifle chungchangte pawh sawi a tam a, thil tha han tih hian a titu nih kan inchuh a. MNF term hmasa kum 10 kalta khan tam tak an ti a, mithenkhat te chuan sipai an sawn thei ngailo e, eng sokar mahin an sawn ngailo tih te pawh a lar hle a. Mahse, kan House Leader kaihhruaina hnuaiyah a

lo theih teh meuh a. Tin, Capital Complex pawh engemaw chen chu kan chuh a ni tih a takin kan hmu a. Chuvang chuan Governor thusawi hi a ropui ka tiin lawmna tur a tam hle tih kha ka sawi theih ni se. Pu Speaker, ka lawm e.

SPEAKER : Dr. ZR. Thiamsanga i lo sawm ang.

Dr. ZR. THIAMSANGA : Nimina Governor zahawm takin a thusawi kha ngun takin ka lo zir chiang a, thil lawmawm lam hliir a ni in ka hria a. MLA zahawm tak tak te khan an rawn sawifiah hlawm tawh a. Amaherawhchu, mahni ngaih pawimawh zawng deuhthe han thual leh pawh ni ila a pawiin ka ring lova.

A hmasa berah chuan Mizoram state, India ramah state ralmuang ber a ni chho leh kan Police te hnathawh that chungchang te an rawn puang a, a lawmawm khawpin ka hria a. Amaherawhchu, hetiangka kan Police Department ten hna tha em ema an thawh lai hian infrastructure lamah an building-te pawh hi tun kum 10 kalta khan an lo ngaihven lo nge ni, tun fur ruahtui rawn tla turah phei chuan an quarter tam tak hi luah theih loh khawpin a chhe tawh a ni. Tin, duh anga hna an thawh theih lohna chu motor te pawh an nei famkim lo a, an nei tha tawh lo a. A bik takin Champhai Police Station- a an quarter te phei chu luah tlak hi a awm mumal tawh lo a ni. Chuvang chuan tun kum 10 kaltaa sorkar khan Police Department-te hi an lo ngaihsak lo em ni aw tih mai a awl a lawm. Amaherawhchu thil tam tak chu an ti a, khang zawng zawng thuam tha tura Governor-in a han sawi te kha a ropui a, lawmawm ka ti khawp mai.

Tin, Horticulture-te, AH & Vety tihchangtlun tur chungchang a han sawi te kha, a bik takin Horticulture-ah phei chuan keini Champhai bialah chuan Hnahlan leh Champhai winery te khi Mizoram pum pawhin an hriat, eizawn nana mi tam takin an lo hman a ni a. Amaherawhchu, khing zawng zawng khi tunah chuan awmze neilo in a lo ram ta a. Heng zawng zawng te pawh hi tuaithar that leh a ni dawn niin ka hria a, ka lawm khawp mai a. Tin, tun hmaa Vety Department hnuai Champhaia Milk processing plant kan tih, mipui ten tangkai taka kan lo hman thin chhe ta te sum tam tak senga an lo din rawih ta te pawh khi tuaithar leh ni dawn awmin a lang te khi a lawmawmin ka hria a. Tin, chu loah chuan organic farming kan ti a, Mizoram chu India ramah hian cancer tamna kan ti a, a bik takin Serchhip phei hi chu

pumpui cancer ah phei chuan India ramah cancer tamna ber a ni kan ti a ni. Hengte pawh hi pesticide kan hman vang pawh hi a ni ve thei mai lo maw tih te hi rilru ah a awm a. Chuvangin organic farming uar tura hma la tura a rawn buatsaih te hi a lawmawm hlein ka hria.

Tin, kawng chungchang kan sawi tawh a, kum 10 chhunga kan ramin kawngchhiat vanga kan tawrh nasat zia te, hmanni lawkah ni 28 khan Pu Speaker, Champhai-ah ka han zin a. Keifang leh Khawzawl inkar ringawtah pawh kan kawng tet leh chhiat avang khian truck 10 lai mai a lo tlu a, kawng chhak lamah te, a then chu kawng thlang lamah te, a then chu an accident phah ta a ni. Intawh hleih theih loh in, in pel hlei theiloin a awm a, kawngpui an ngai pawimawh te hi lawmawm ka ti a, a thla pawh Pu Speaker, ka la hial a.

Ka hriat sual loh chuan Pu Speaker, nangmah ngei pawh kha khilamah khan i chho in ka hria a. Tin, kan Forest Minister, Sport Minister-te ngei pawh an han kal chho a, motor lian kawng sira tlu tam tak a awm a ni. Khing ho zawng zawng ruahmanna tura kawng an ngaipawimawh te hi a lawmawm hle in ka hria a ni. Chuvang chuan thusawi kha lawmna tur tam tak a awm a. Tin, ka ngaihpaawimawh ber pakhat, MNF sorkar hmasain Health Care System, Mizoram State Health Care System a lo champion pui tawh kum 10 chhunga ngaihthah a lo nih, tuna an tuai thar leh tur hi lawmawm ka ti a.

Tunah India ramah hian ABPMJY hmangin Health Care Scheme ropui tak kan nei a. Amaherawhchu hei hi a famkim lova, state sorkar Health Care Scheme nen mumal taka kan enhance loh chuan transportation charge-te leh thil tam tak sawi tur chu a awm, wawiinah hian kan sawi seng lo ang. Heng zawng zawng enhance tura kan sorkar in hma a han la tur te hi mipui, mirethei tan chuan a va han hlu dawn em tih kha wawiinah hian ka sawi lang leh duh a ni.

Tam tak sawi tur a awm ang a, amaherawhchu thingtlang, rural a chengte hriselna kawngah te, ei leh bar kawngah te, hetianga ruahmanna an siam hi tha ka ti a, khawpui ringawta kan inhnawh a, khawpui ringawta kan pem chuan a dik dawn lo a ni. Chuvangchuan rural development, zirna kawngah te, ei leh bar chungchangah te, tui te, power supply chungchangah te, heng zawng zawng thingtlang mite hmasawna tur Governor-in a thusawia ruahmanna a rawn siam hi ropui ka ti a. Hun reilote chhunga kan

Chief Minister zahawm takin heng kan khawpui kawng hetiang khawpa lo chhe tawh a han tuaihnun thar leh te hi kan Chief Minister zahawm tak chungah leh Council of Ministers te chungah pawh lawmthu vawiinah hian ka sawi a ni. Pu Speaker, ka lawm e.

SPEAKER : Hun i hmang tha e. Member zahawm tak Pu K.T. Rokhaw i lo sawm ang.

Pu K.T. ROKHAW : Pu Speaker, ka lawm e. Kan Governor thusawi hi lawmthu sawina tur hliir niin ka hria a, a lawmawm ka ti a. A lehlamah chuan sorkar hmasa Congress sorkar huna an hnathawh vek a ni a. A dik tak chuan sorkar thar te chu hei thla thum erh awrh a la kal rih a, chuta kan Governor-in department hran hrana sorkarin hna a thawh a sawi te hi lawmthu sawina tur hliir a niin ka hria. Mizoramah kum sawm chhung Congress a sorkar a, Congress sorkarna hnuaiyah law & order-ah harsatna kan tawk lo a, India ramah pawh state muanawm ber te zing ami kan ni thei te hi a ropui ka ti a, hei hi sorkar hmasaa kan hotute thawhrimna rah a ni kan ti lo theilo a, chuvangchuan a lawmawm ka ti.

Tin, Police te thawhrimna leh inpekna hi a ropui a, kan Police te hi infrastructure te, modern equipment leh manpower-ah te thawm that a ngaih thu Governor-in a sawi hi a lawmawm ka ti takzet a ni. Tin, kan ram border-a him zel theih nan sorkar-in hmalak a tumna te hi a ropui ka ti a. Nichina zawhnaah pawh khan a bik takin Chakma area-ah pawh hian thuthang kan hriat ah hian Bangladesh atanga rawn pem, khaw thar lo din te awm anga an sawi te hi, a dik leh dik loh sorkar hian finfiah se a tha khawpin ka hria a. Tin, Zophaia a Assam nena kan ramri te pawh hi kan sorkar thar hian theipatawpin hma min lak sak se tha in ka hria.

Tin, Governor-in border area chungchang a ngai pawimawh hi a lawmawm ka ti a. Border area-a chengte develop-na tura sorkarin hmalak a tumna hi a ropui ka ti a. Keini hi border area-a awm kan ni a, BADP sum hi border area tih hmasawna ropui tak a ni a. Chuvangin ka sawi duh chu, BADP sum hi border area-a chengte hmasawna ropui tak a nih avangin, a hna pawh hi border area amite duhsak ni hram se a lawmawm ngawt ang. A tlangpuiin, helai khawpui miten he hna hi an lo hmuhin an hralh chhawng a, hna hi a tha thei thin lova, chuvangin border area amite hi duhsak hram ni se a lawmawm ngawt ang.

Tin, Assam Rifles Zokhawsang a sawn a ni ta hi ropui ka ti a, lawmawm ka ti a, heta kan sorkar hmalakna hi lawmawm ka ti a. Hei hi Congress sorkar pawh khan theihpatawpin hma kan la a, mahse vawi leh khata tih hlawhtlin theih a ni lo, MNF sorkarin theihpataw an chhuah a, a hlawhtling a, a lawmawm hle. Chuvangin, he AR ground hi sorkar hian humhalh tlat sela, stadium ropui takte a sak theih ang a, park tha takte a siam theih dawn a ni.

Tin, kan sorkar hmasain PMGSY kawng tam tak a laih tawhte Governor-in hetah hian a rawn sawi chhuak a, lawmawm ka ti tak zet a ni. Tichuan Pu Speaker, hun tawp hmain tlemte, education improvement tihah hian tlem sawi ka duh chu, education quality improve tur chuan teacher an pawimawh a. Teacher kan nei thalo em em a, kan Minister-in min hriatsak tura ka duh chu, ka bial Zawngling chuan sikul hotu pathum chiah an nei a, pahnih an pension a, tunah pakhat chiah a awm a ni. Tin, Chakhang ah khian pathum an awm a, pakhat a pension a, tunah pahnih chiah an awm bawk a, education quality improve tur chuan hotu thar min pek a ngai a ni. Hei hi tlem ka han sawi duh a ni e. Ka lawm e.

SPEAKER : Aw le, hun i hmang thiam e. Tunah MLA zahawm tak Pu Lalchhuanthanga, pakhat chiah kan la la thei, kan zawh hmain.

Pu LALCHHUANTHANGA : Pu Speaker, ka lawm e. Governor speech-ah khan lawmthu sawi tur tam tak a awm rualin, duhthawhna avangin point thenkhatte han ti ri ve ta ila.

Point pasarihna-ah khan Agriculture chungchang a sawi a. Khatah khan link road kan ngai pawimawh hle a. Link road laih tawh kha 786 niin a lang a. Link road laih tawh sa hi enchian ngaiin ka hria a, laih tawh si, zawh hleitheihloh hi a ni fur zawk mai a. Chuvangin kan link road laihte hi quality ve deuh zawk leh zau deuh hlek te pawh khan laih ni thei sela a lawmawmin ka ring a, loneitute tan hian a pawimawh si a tih kha ka han sawi duh a.

Pahnihna ah chuan, point 11-na, NEC kan lo nei tur hi lawmawm ka ti a. Helaiyah hian, tun kum thara class tan theih mai tur ang te khan sawi a awm a, faculty te hi kan nei tha tawk em tih te, teaching equipment lam te leh practical facilities lam chi reng reng te kha a pawimawh a, tun atanga fumfe deuh taka class tan theih ni se a thain ka ring a.

Point ruk-na ah khan Police chungchang a rawn sawi a. Police modernize lam kha kan uar viau a, kan uar lutuk ang a kan kal thui deuh ang tih te kha a hlauhawm a, mawza manto tih te kha a lo ri leh mai ang tih te a hlauhawm thei a. Police Department-ah hian hna ruak tam tak a awm niin a lang a, kha kha tih rik a ni lo tlat mai kha pawl ka ti a. Kha hna ruak kha eng anga hnawh khah tur nge tih kha a pawimawh viau mai a. Dan leh thupek enkawl tur hian kan Policemen te pawh hi tih chak deuh hlek te pawh hi tulin ka hria a. Physical fitness lam te pawh hi ngai pawimawh ta ila, political fitness lampang ai mahin kha kha a pawimawhin ka ring a. Heng hna ruak hi eng anga tih khah tur nge, lak tur nge tih te kha nakinah Budget Session puitling kan neih hunah tihrik te pawh a la ni turah ngai ta ila.

Tin, point 14-na ah khan Bamboo Plantation te pawh kha a lo ri a, hei hi kan sorkar thar hian a ngai pawimawh dawn hle niin a lang a. Tunah pawh hian Bamboo Link Road Committee tih te, Bamboo Development Committee tih te pawh a ding niin kan hria a, heng te pawh hi zau deuh zawka member ten bamboo-ah hian eng angin nge hma kan lak zel dawn tih te pawh hi hriat tum ila, hriat atan a tha e ka han ti deuh a ni. Chungte chu Pu Speaker, Governor Speech chungchanga lawmthu sawi em em tur chu ka nei lo na a, duhthawhna ka rawn ti ri ve a nih chu. Ka lawm e.

SPEAKER : Hun i hmang tha e. Aw le, thingpui in in chawl ila dar 2:00 PM ah kan tan leh dawn nia.

Recess at 1:00 P.M

2:00 P.M.

SPEAKER : Tunge chhunzawm leh ang le? Pu H.Lalbiakzauva, member zahawm tak ilo sawm ang.

Pu H. BIAKZAUA : Pu Speaker, ka lawm e. Kan Governor zahawm takin House a address lawmthu sawina hun, chawhnu hun a hun hmasa ber min pek avangin lawmthu ka sawi a ni. Kan ngaihthlak teuh tawh ang khan mihringin kan mamawh hi thil tam tak awm mahse a zualpui bik ei tur te, kalkawng tha te, tui hniangnar te, eng tha te, zirna tha te kan mamawh em em a. Chung chu kan neih theihna tur leh manpower, kan nihna tur ang leh kan

tlin tawh, kan phak tawh anga lanchhuah theihna tur Governor-in a rawn tarlan zingah hian a tel famkim hlein ka hria a, a lawmawm ka ti a ni.

He MNF sorkar, Pu Zoramthanga, Chief Minister zahawm tak kaihhruai hi kan hriat angin a la rei lo em em a. A rei loh em avang hian thil tam tak Governor address-a rawn lang kha kan tih sa a ni e tihna lam a kawh lo a, hma lak tur tam tak a awmna kha a lang tam ber a. Tin, khang zingah khan kan hnung Session laia Governor Address-a thil lo lang tihhlawhtlin tawh eng emaw zat an awm tawh bawh niin a lang a, a lawmawm hlein ka hria. A bik takin khawpui laili taka sipai awm, AR hmunte sawn a ni dawn a, a lawmawm hlein ka hria.

Tin, zu zawrh tih tawp chungchang hi kan hriat angin thu a kal chho mek a. Tun tumah hian a tawp fel thei ngei dawn ni te pawhin a lang ta a. Heng avang hian Mizoram hi HIV-ah pakhatna hial kan lo thlen phah ni pawhin a lang a. Tin, population base in hmeithai tam na ber state India ramah pawh a tlingchho thei hial mai niin a lang bawh a. Heng zawng zawng te hi kohhran ten tawngtaina a nasa taka an lo dil tawh chhanna MNF sorkar lo ding hi ni a a lan avangin, tunah pawh thiltih tum a lo neih, inthlan hmaa a lo puan chhuah tawh te chu a tihlawhtling chho mek zel niin a lang a.

Tin, kalkawng pawh hi ngaih pawimawh tur tih zing ami a nih ang ngeiin, Lawngtlai a awm ka ni a, Lawngtlai atangin Aizawl hi kan lo kal thin a, a hla viau a. Kawngdungah, kalkawng siam mek, hnathawk mek hmun tam takah an awm a. Tin, chubakah thawh tawh sa eng emaw chen kawngchhia thawm leh bel ang chi kha hmuh tur a awm bawh a. Tin, Aizawl city chhungah hian kan hriat angin hmun tam takah kawng chul mam mek te niin a lang bawh a. Chutiang chuan kan hnung Session-a Governor Speech-a thil awm kha tunah mai pawh hian hmuh theihin eng emaw zat a lo lang chhuak niin ka hria a, lawmawm ka ti a ni.

Tin, sports lamah te pawh kan hriat angin Aizawl Football Club hi a lo lar hle a ni ang, kan hnunga Delhi-a Orientation Course-a kan zuk kal pawh khan hei, a changtupa Pu Robert Romawia Royte a awm a. AFC hmun tam takah an lo hre bel ang reng khawp mai a, football ngaina mite chuan. Kan kalna leh mi kan hmuh ten AFC enkawltu/neitu a nihna han sawi chuan an hre lar hle mai a. Sports lamah pawh hian hma kan sawn chho hle dawn pawhin

ka hre nghe nghe a. A changtu tur awm tak pawhin a chang ni pawhin ka hriat phah ve nghe nghe a ni.

Tin, school timing pawh kan hnam zia milin tihdanglam a ni a, a lawmawm tak zetin ka hria. Thil tam tak tunah tihlawhtlin leh tihpuitlin a awm tawh a. Governor address-a thil rawn lang tam tak kan hmachhawpte kha chawpchilha tih theih nghal a awm a. Tin, nakin hun deuh hleka hlawhtling chho tur te pawh a awm a ni tih kan hrechiang awm e. Ka lawm e, Pu Speaker.

SPEAKER : Pu Vanlalhlana, member zahawm tak.

Pu VANLALHLANA : Pu Speaker, ka lawm e. Article 176-in a phut angin Governor zahawm takin nimir Assembly House a rawn address a. Thil tam tak a rawn lang a, ama tawngkam ngei atang hian he sorkar hlawhtlinna leh hmachhawp mekte tarlan a ni a.

Para hmasa ber han thlir hian sorkar chu lang tlang sorkar, rorelna dik leh felfai, rin ngam leh rintlak sorkar a nih tur thu a sawi a. A ngaihnawm hle in ka hria a. Chutiang taka kal tur pawh chuan ka duh khawp mai. Amaherawhchu ka beisei loh deuh maiin nimir tlaiah dar 3:30 vel khan Mizo nula leh tlangval sawm rual hi kan inah an lo kal a. An rawn sawi chu 'Social Welfare-ah hna 22 a ruak a, kan dil a, written exam te kan nei a. Tichuan result chhuakah mi sawmnga pali kan tling a, chungte chuan computer test hmachhawn leh tur kan ni a. Amaherawhchu kan hmachhawn leh dawn lai chuan candidate kan pung ta thut a, 20-in an rawn belh a, tichuan 74 kan lo ni ta a. Kan sawisel a, computer test hun te pawh chu an han postpone a, an postpone leh a, tunah pheii chuan an cancel ta vek a,' tiin an rilru nat thu kha an rawn sawi a ni. He sorkar hi Governor-in a sawi ang hian sorkar rorelna dik leh felfai kengtlang tura kan duh em em a ni a. Bul an tannaah hian hetiang thil lo awm ta hi a pawh ka ti khawp mai a, Mizo nula leh tlangval rilru a na a. Written exam paltlang 54 te khan computer test te ti se, tupawh tling se an pawm em em a. Amaherawhchu an hriat loha 20 dangin an rawn belh kha an hrethiam lo a. Chu chu vawiih hian a hmasa berah ka han tarlang duh a ni.

Governor address-ah hian thil lawmawm tam tak a lo lang a. Chutih rual chuan thil naran ve ang te pawh a awm a. A hmasa bera ka tarlan duh chu

para no.6-naah hian thil lawmawm tak mai a lo lang a. Sorkar chuan state boundary te khauh takin a veng dawn tih a rawn lang a ni, a lawmawm ka ti a. Boundary problem Mizoram, Mizo mipuite hian kan neiin kan hre flat a. International boundary a ni lo a, Manipur leh Tripura kan inkar boundary a ni lo a, Assam nena kan inkar boundary a ni. Nikum lamah khan MZP ten chawlhbuk te an sa a. Assam sipai ten, Assam police ten an rawn um a, silai hmet puak khawpin ralti takin an awm a. Khang ang kha thleng tawh lo se, kan Police te leh Mizoram sorkar pawh hian a tul hunah chuan kan thalaite, kan zirlaite thlavang hauh se tih kha ka phut duh a ni.

Tin, ka han tarlan leh duh chu para no. 9-naah hian Power chungchang a lo lang a. Sorkar hmalak tum dan a lang ta miah lo a, a pawl ka ti a. Power tel loin hmasawna a kal tak tak thei lo a. December ni 19-a Governor Address-ah khan Power chungchangah hma lak a ni dawn. Tuivai mega watt 210 tichhuak thei turin NEEPCO-te nen Memorandum of Understanding te pawh sign a ni tawh tih kha Governor-in a rawn tarlang a. Thla hnih a ral hi chuan foundation stone phum in bul tan a ni e tih hi ka lo beisei deuh hlek a. Vawinah chuan khatiang zawng kha engmah a lang ta lo a. Kan han chhiar zela lo lang ta chu 2017-2018 inkar ah revenue hi crore 213 hmuh thu a lo lang a. Chu chu a hma aiin a sang fe a, 10% in a sang leh zual dawn a ni tih te a lo ni ta a. 10%-a a san leh theih dan tur chu electric bill tih san a ni ta a ni. Chuvangin sorkar hian mipuite hi min dim deuh se tih ka sawi duh a ni.

Tin, Governor address-ah hian issue lian tak tak rawn lang lem lo a awm a, entirnan ZOHANCO te pawh company thiah tawh tur tia sorkar hmasa lamin hma a lo lak tawh a ni a. Amaherawhchu tihnun leh a ni dawn a, hengte hi a chhan leh a bulthum te pawh kha han hriat ve a chakawm viau a, tarlan a ni si lova. Tin, Memorandum of Settlement hi a lang miah lo mai a, Memorandum signed a nih avang khan remna leh muanna te pawh kan nei a nih kha. Mizo mipuite thlamuang takin kan awm thei a, hmasawna te pawh kan neihna chin a awm a. Governor address-a a lo lang lo hian a ti famkimlo ka ti a, chuvangin a khingbai viauin ka hria a ni.

Tin, tarlan awm taka ka ngaih issue lian tak, Citizenship Amendment Bill chungchang a lo awm a, Mizo mipuite kan lungualna hi tarlan awm tak ka ti a, sorkar pawhin theihpatawp a chhuah a, NGO pawhin

theihtawp a chhuah a. Chutih rualin kohhran hruaitute thlengin mipui zawng zawng kan tangrual a ni. Kan tantlanna rah pawh kan hmu in a lang a, chuvangin Mizo mipuite kan inlungrual a ni tih kha han tarlan a awm ve viau in ka hria a ni. Ka lawm e.

SPEAKER : Pu Andrew H.Thangliana i lo sawm ang.

Pu ANDREW H.THANGLIANA : Pu Speaker, ka lawm e. Governor address chungchanga thusawina hun min pek avang hian ka lawm e.

Governor speech point 5-nah khan SEDP chungchang kan hmu a, a huapzo zawngin kan hman ang tih kha a lang a, a lawmawm hlein ka hria. Sorkar hmasa programme kalphung ang ni lo va a zeuh zeuha sum sem ni lo va, tanpuina pek a nih tur thu te kan hmu a, a lawmawm hle bawkin ka hria a ni. Tin, kawng tha siam chungchang a rawn sawi te, Skill Development-te, Border trade chungchanga hmalakna tur speech kan hmu tel kha a lawmawm in a tha ka ti tak zet zet a ni. A pawimawh ber Mizoram sorkarin kan sum hnar Agricultural and Allied Sector “Top-Priority” kan pe ang tih hi a tak a thlen hun a nghahhlelh awm hlein ka hria a ni.

Tin, point 7-naah khan agriculture and farming tih te, technology transfer to farmer tih te kan hmu a. Hemi atan hian tunah kan state hian centrally sponsored KVK centre district 8-ah, boruak chi hrang hrang leh alleviation hrang hrangah kan thlai chin te, project kan nei mau kan han sawi rik leh tak te pawh a enchhin theihna hmun kan nei thluah tawh a. Tin, Agriculture Technology Mission Agency, farmer-te hnena technology hlan chhawng thei tur institution tha tak tak kan nei a. Hemi ah hian a detail in a lang lo na a. Mau, Mizorama kan resource lian ber pawh hi awmze nei taka hman a mi huana hnawk mai mai ang chi ni lo kan chawh luh ve theihna tura mumal taka hmun siama kalpui a thain ka hria a. Chungte chu ka rawn tarlang duh a ni.

Thil tih theih ngei tura kan ngaih SEDP bikah viable project siamin, kan sawi tawh ang khan a zeuh zeuh lo va, chhawrzui tlak tur chhungkaw tin hnena pek tur kan sawi, chung tin milin sorkarin eng ang chiahin nge a enpui ang tih kha chu kan la hre lo na in, a enpui thei turah kan ngai a ni. Chhungkaw tin ten nuai thum theuh an dawn

ngei theihna tura project tha tak a thlawna siamsak te pawh kan hna niin ka hria, he sorkar hian. Mahni tana project tha pawh hrethiam lo a tam zawk kan nih avangin, project-te pawh a rawn kal ang a, nuai thum dawn beiseiin a feasible lo tia hnawlte a awm lo turah ka ngai a. Kan Governor pawhina sawi, a taka a thlen theih nan project thami chhungkaw tin in kan neih theihna turin sorkarin hma min en pui turah ngai ila. A tlangpui thuin Governor speech-a sorkar tharin hma a lak tumna te a tha ka ti a, ka rawn tarlang ve a ni e. Ka lawm e.

SPEAKER : Pu H.Lalzirliana i lo sawm ang.

Dr. H. LALZIRLIANA : Pu Speaker, ka lawm e. Minute 5 chauh min pek avangin rang tak leh fiah takin sawi ka tum ang a.

Kan Governor-in speech a rawn present hi a tlangpui thu chuan a tha vek a. Tin, chu chu kan ti e, khami kan ti e ti a han sawi fak fak loh deuh te pawh awm mahse statement hrim hrim hi positive a ni a, hma thlir awm a ni a, hmalakna tur awm chi a nih avangin a phurawm ka ti a ni.

Elementary Education hi tunhma lama an lo suasam dan hi tlem sawi ve ka duh a. Sorkar thar hian mumal taka ennawn chhoh leh structure mumal deuh pawh an siam turah ka ngai chho va, lawmawm pawh ka ti a ni.

Ka bial chhung hi in lo hriat chian loh takin ka sawi ve hrim hrim ang a. Ka bial chhung hi district pahnihah a awm a; tin, BDO pali co-ordinate ngai a ni a, kalkawng vel chu sawi ngai lova in hriat a nih kha. Lawmthu han sawi lawk ka duh a, kum 30 kal khan ka khua Mamit khu ka chhuahsan a. Ka chhuahsan nachhan chu science zir ka duh vang a ni a. Kum 1988-ah ka chhuahsan a, 2018-ah Mamit pa ni turin ka lut leh a, chutah pawh chuan science zirna chu a la awm chuang lo a ni.

Tunah chuan 12 Science zirna an rawn siam thar hi a lawm ber te zing ami ka ni a, chuvang chuan lawmthu kan sawi pah ni sela.

Tin, sorkar a thar veleh SSA zirtirtu regular lova chhawr ho hlawh an han released mai te kha sorkar hmalakna a ropui ka ti em em mai a

ni. Mi tam tak ten lawmthu an sawi a, kan bial mite an lawm leh zualin ka ring a ni. Primary Sikul 58 a awm a, chutah chuan zirlai 3238 an awm a, zirtirtu 168 an awm a, zirlai 20 zel hi zirtirtu pakhatin a vil a ni. Aizawl sikul thenkhatah zirtirtu 5-in zirlai 10 tih ang kha chu a ni lova. Middle sikul hi 47 a awm a, zirlai 2429, zirtirtu 246, mi 10 zel zirtirtu pakhatin a vil ang a ni. Hetiang hi kan dinhmun chu a ni a, kan sorkar chak tak hian hei pawh hi min enkawl sak dawn niin ka hria, ka lawm hle a ni.

Governor speech zinga ka tarlan tel duh chu tourism a ni a, tah hian kan sorkar hmasa leh kan hun kal taa Tourism kan hriatthiam chu Tourist Lodge sak hi ni deuh mai in ka hria a. Lodge hi hmun tinah kan sa a, thleng erawh chu kan tam lem hlei lova. A tam lutuk vang a ni mahna! Hun engemaw lai phei kha chuan an auction an chhang vel ni te in a lang a ni. Tourism potential ngah ber kan ni tih hi chu kan chiangin ka hria a. India ram khawpui hrang hrang hi tlawh loh pawh ka nei mang tawh lova, tourist place kan tih hi keini aia ho ve tak tak hi a ni a.

Airport atangin kan han chhuak hlawt a, Aizawl kalkawngah tuikhawhthla a lo awm pur pur mai a. Darjeeling velah tourist attraction atana an hman aia ropui kan nei nghal a ni. Tin, Forest lamah ni se chu chu kan potential neih zia ka sawi lanna ni se.

Tin, road and infrastructure te kan ti a, kan kawng kan hria a, Mamit phei chu Sumo driver pakhat kha a permit-te an tihlum phah a, amah kha an man phah lek lek lehngal a. Kan kawng chhiat zia kha kan hria a, sorkar thar thla hnih/thla thum hnuah hetiang hian hma kan han la a, kan Chief Minister chak tak kaihruaina hnuaiyah. Kum sawm hnathawh tur hi kan hmu lo mai ang tih hlauhthawnawm khawpin hna hi a kal chak niin ka hria a, a ropui khawp mai a, mipuite pawh an lawmin ka hria.

Tin, Health Care chungchang, hospital facilities hi a mamawh ber district-te zing ami kan ni a. PMMVY, raipuar laia facilities, incentive kan hmuhte pawh hi hei aia nasa zawk hian vawrh lar ila, thingtlangah phei chuan a pawimawh lehzuak ka ti a. Health department te pawh hian nasa takin min kaihruai sela. Tin, Sports Minister chungah ka lawmna em em chu Mamit

district-in Lengpui ah SAI complex kan din dawn niin kan hria a, kan han sawi pui a, chungte chu hma min lak sak dawn a.

Tin, District huapin Football stadium kan nei ve dawn niin kan hria a, district dangin pahnih/pathum an neih tawh hnuah mi hnungah chak takin kan tlan ve a lawmawm kan ti viau a ni. Chungte chu lawmthu sawi pahin ka han sawi tel a ni e. Ka lawm e.

SPEAKER : Pu Lalrintluanga Sailo i lo sawm ang.

Pu LALRINTLUANGA SAILO : Pu Speaker, ka lawm e. Vawiina Governor thusawi chungchanga lawmthu sawina motion kan khel hi lawmawm hlein ka hria a. Nichinah khan Aizawl North I bialtu zahawm tak Pu Vanlalhlana sawi ang khan, a thu sawi hmasa atang hian confidence, inrintawka nei takin thu a rawn sawi hi lawmawm ka ti a. Chutah chuan mipuite tana chhenfakawm sorkar min tiam a, chutihruah chuan a tul hunah chuan mawhphurhna pawh la ngam sorkar min tiam a ni. Sorkar hmasa kha khatiang mawhphurhna la ngam awm taka kan ngaih la ngam lo kan hrawn thin kha a ni a Pu Speaker, tun hunah hian lawmna tur a va tam em tih hi ka sawi lang duh a.

Chutihruah chuan North-I bialtu zahawm takin a rawn sawi Social Welfare Department-a interview koh chungchang kha tlemin thil a hre sual niin ka hria a. Khalaiiah khan a changtu Minister hriatpui lohin thil kalpuite a ni a, central guidelines-in heng project assistant hnuaiia Government of India-in under National Nutrition Mission guidelines dan ni lova a lo tihte avanga kha interview kha tihtawp nghal a ni tih zawk a ni a. Chuvang chuan helaia Governor thusawi paragrah hmasaa a rawn tarlan langtlang taka sorkarin a kalpui dan turte a rawn sawiah hian a bik takin Social Welfare Minister pawh kha chawimawi tlak zawkah ka ngai deuh a ni. Tunhmaa tih mai mai ang chi kha langtlang takin a takin an kalpui nghal kha lawmna tur zawkah kei ka ngai zawk a ni.

A dawt leha chuan ka hmaa member zahawm tak Pu H.Lalzirliana'n a sawi tawh ang khan keini border area-a awm kan ni a, Governor thusawi phek thumnaa lo langah khan keini border area-a awmte tan zalenna dar min vuak sak a ni ngawtin kan hria a, kan lawm hle a. Kan himna tur te, border area-a awm kan nih avanga tanpuina tur hmalakna tur lo langte kha lawmawm kan ti

a. Chutihrual chuan boundary tak takah khuan leh lam atanga rawn pakaite an awm thin avangin Governor thusawiah hian Household Register buatsaih a nih tur thute a lo lang a, a lawmawm hlein ka hria a. Khatiang register kha village tinah kan nei a nih ngat pheih chuan foreigner leh foreigner lo kha kan chiang dawn a ni Pu Speaker. Chuvang chuan kha kha kan ram tan kan inchirh thehna fo thin border area-a mihring pun dan pangngai aia nasa a kan pun thinna kha a veng ngei ang tih a rinawm a. Chuvangin hengte hi a lawmawm hlein ka hria a, a bik takin ka tarlang duh a.

Tin, a bikin kan himna atana hnathawktu kan police-te thuam thatna tur chungchang lo lang hi lawmawm ka ti a, lawmawm ka ti satliah mai a ni lo a, kan police-te kan himna tur atana hma la thintute sorkar hmasa hun atangin inthlahdahna a nasa hle a ni tih kan hria a. A bik takin kan thuam thatna turah hian hmanraw chungchangahte leh mi thar lak chungchang piah lamah trainingte a rawn sawi lang kha a lawmawm ka ti a. Ka duh dan tak pheih chuan refresher course neiha kan police zawng zawng hi khatiang zawnga kan kalpui kha a tulin ka hria a. Zu kan zawrh hnan avang khan kut khur hluk hluk chungka kan bula awm thinte hi an awm a ni. Kan himna atana hnathawktu an nih si chuan rin ngamte pawh an harsa thin a, chuvangin khati zawnga ngaihtuahna neia Governor-in training tha zawk pekna tur a sawi lang kha ropui ka ti a. Chak taka hma lak nghal chi ni te pawhin ka hria a ni, Pu Speaker.

A dawt leha ka sawi duh chu Sports chungchangah hmasawna tura hmalak dan turte a rawn sawi lang a, hei hi a pawimawh hlein ka hria a. Hmanniah kan Sports Minister-te nen Delhi-ah kan zuk kal khan thil ropui tak ka hmu niin ka hria a. Nichina member zahawm takin a sawi ang khan kan Sports Minister hi a bikin football-ah leh sports discipline hrang hranga lo inhmang thangte niin khatiang lamah khan experience a nei a. A enkawl tur dik takin a enkawl nia ka hriat rual rualin, North East state ho hian tun hunah hian inthlan a lo hnai a, All India Football Federation-ahte pawh hian Sr. Vice President hi kan nei thin a ni, tunah hian Lajong Football Club neitupa khu All India Football Federation-a Sr. Vice President a ni a. Chutah chuan ani pawh khu an ning tawh riau mai a, a kalphungah khuan. Kan Minister hi min aw h pui em em a ni tih thute Delhi tlangah khan kan ngaithla a, lawmawm kan ti a, hmalak pui pawh chakawm kan ti a ni.

A dawt lehah chuan Tourism chungchangah hian sawi tur a tam a, mahse hunin a daih si lo a. Ka sawi duh lai chu MNF minstry hmasa khan Tourism hmasawna atan hian central sorkar atangin nuai zariat ngawt mai kha hmuin building-te pawh sak chhoh a ni a. Amaherawhchu sorkar kalta khan hma a lak that duh loh avangin harsatna kan tawk a, tuna kan Tourism Minister Delhi zuk kal khan nuai zahnih hmalakna turin a sawi chhuak leh a. Khang Governor speech-a a lo langte kha lawmawm ka ti a. Chuvangin hengahte hian lawmthu nasa taka sawi tur kan va ni em ka ti a ni. Aw le, chu chu hunin min daih si lo a, ka sawi theih tawk ni mai teh se. Pu Speaker, ka lawm e.

SPEAKER : Tunge sawi leh dawn? Pu Vanlalhlana i lo sawm ang.

Pu VANLALHLANA : Pu Speaker, ka lawm e. Governor zahawm tak thusawi chungchangah khan sawi chakte ka nei teuh a, sawi vek sen a ni lo a, point rukin ka rawn then a. Phek li-na point number pasarihna-ah khan thlai thar chhuahte hralhna kawngah hma lak a nih tur thute kan han hmu a, keini ZPM-te chuan kan lo au pui nasa tawh khawp mai a. Thingtlang mite chawikanna atan kan policy pawimawh ber a ni a. Amaherawhchu a tih dan turah khan “by increasing marketing infrastructure” an han ti deuh tawp mai a, market infrastructure ringawt lo deuh kha a itawm a, market kan zawnsak a tul a. Market zawng tur hian kan researcher neih te, kan sorkar hnathawkte pawh hi hman thiam a ngai khawp mai a, khalamah khan tan lak a ngaiin ka hria a. Kan hotuten, ‘hei hi ching rawh u,’ an ti a, an ching teuh a, a hralhna turah an buai leh a. An rilru kan tihnat sak leh thin hi tih tawp a hun tawh viauin ka hria.

Pahnihna-ah chuan point 11-naah education reforms siam tum a nih thu kan hmu leh a, hei hian min ti lawm khawp mai a. National Achievement Survey 2017-ah khan India ram pumpuia zirlaite zirchianna an neihah Mizoramah pawl thum hian national average kan pha a, pawl nga-ah kan pha lo tan a, pawl riatah phei chuan national average kha, zawhna inang an chhanna-ah khan kan pha tlat lo mai a. Chuvang chuan hetah hian tan lak a ngai khawp mai a, world class education pawh ni lo India class education pawh kan la pha lo a ni a. Kan tan sauh sauh a ngai a. Mathematics-ah phei chuan state dang kan umpha lo lehzual a. Tin, kan tu leh fate hi lehkha an zirnaah hian hna hmu turin, hna an hmuh theih nan lekhate kan zirtir thin a,

kan education system hi thlaka, mahni kea an din theihna tura kan buatsaih a ngai tawh a ni. Hna zawng tur ni lo, mahni kea ding tura education system kan thlak a ngai a, chu chu reforms hman hian kan thlak thei turah ka ngai a. Quality education siam tum vek sorkar kan lo hrawn tawh a, zirtirtu laknaah quality nei tha aia sawipuitu nei tha kan la zel a nih chuan national average pha loa kan awm hi kan phak tawk lek a ni. Keini hi siamtha theitu kan ni a, tan i la ang u ka ti leh duh a.

Tin, pathumnaah chuan point 10-naah cleanest state in India siam tumna kan han hmu leh a, a lawmawm khawp a. Amaherawhchu kan tui luankawrah te bawlhhlawh kan luan tir tlat chuan cleanest state kan nihna tur hi a hla viauin ka hria a, kan khawpui ah te. Chutah chuan a phase wise ang te flushing system in, tlangchhip awm apiang atang hian kan kawr te hi khuh thla ila, ti thla zel ila, tun atanga kum nga kum sawm chho ah hi chuan Aizawl te, Lunglei te leh khawpui dang dang te pawh thianghlim tak kan neih tawh ka ring tlat a, chutiang tur pawh chuan hma lak a thain ka hria.

Point no. 15, 16 leh 17-na ah entrepreneurship lam te, industry te, tourism lama hma lak tum a ni tih te kan han hmu leh a, hei hi a lawmawm khawp mai a. Tuna ruhrel kan neihsa entrepreneurship-ah te chuan MEDMOC-te kan nei a, competition te buatsaih a ni thin a. Entrepreneurship centre te neih a ni a, India ramah pawh state te ah chuan a ti tha ber kan ni a. Kan ruhrel neih sa hi la chhawm nung siin tih belh ngai chu tih belh ni ta mai se, hei hi i kengkawh zel ang u tih ka sawi duh a. Sumdawng tam tak phai atanga lo kal te Mizoramah kan thalai pui ten meeting an han neih pui dawn a. Meeting neihna tur a awm lova, khawilai hotel-ah te emaw, eng emaw ah an inah te emaw an lo thut khawm pui te hi khawilai emaw meeting an neihna tur entrepreneurship centre kan neih pui hi a hun tawh khawpin ka hria a. Chungte chu tih belh a ngai bawkin ka hria.

Act East policy kan hmachhawn mek a ni a, a rawn kal mek a ni a. Hmanni ah Sairang-a an khawtlang hruaitu pakhat mangangin hei college-a thawk te kan ni a, kan principal hnenah a rawn kal a, tihian kan lo dawng tawp mai a, lo inbuatsaih dan tur pawh kan hre lo va a ti a. Chutah chuan keini Mizo te pawh hi leiba state-a awm te pawh hian kan lo inbuatsaih ve na turah hian kan sorkar hian hma lo la se, kalkawng mai kan nih loh nan, bungraw kalkawng, Assamese ho in bungrua an thawnna

kalkawng mai kan nih loh nan Act East Policy kan hman tangkai theihna turin hma lak ni se ka ti leh a.

Tin, panganaah chuan point no. 14-naah environment chungchangah hma lak tum a nih thu kan hmu leh a. Tin, forest report central lamin an tih chhuah ah khan kum 2014 report-ah square km 21,000 lekah khan square km 300 chuangin kan forest a chereu a, 2017 report-ah khan 560 chuangin a chereu leh a ni. Chuti chung chuan hma lak tum a ni zel a, an la mek ni pawhin ka hria a. Helam hi enfiah a ngai khawpin ka hria a ni.

A tawp ber ah chuan Governor thusawiah khan hmasawna thil hrang hrang a vai vaiin a ziah tel theih loh a. Amaherawhchu ngaih pawimawh te a lang thin a ni. Consumer leh land reforms lam hi ngaih pawimawh tel ni thei se tih ka han belh hram a ni e. Ka lawm e.

SPEAKER : Member zahawm tak Pu C. Lalmuanpuia

Pu C. LALMUANPUIA : Pu Speaker, kan Governor thusawi hi a lawmawm hlein ka hria a. Vawiinah hun a tlem avangin point 2/3 vel lek han sawi duh leh lawmthu han sawi duhna ka nei a. Chung zingah chuan a hmasa bera ka sawi duh chu zu zawrh tihtawp chungchang hi a ni a. Kan ram in kan buaipui em em; tin, Mizote hi kan la tlem em em a, thalai kan thi nasa em em a. Zu leh a kaihhnawih avanga thi kan ni deuh berin a lang a. Chutih rual chuan piang kan tlem leh em em mai si a, chuvang chuan kan hnam kal chho zel tur ten hian a him lovin a lang a, zu leh a kaihhnawihin min tih buai dan han en hian Governor thusawia zu zawrh tihtawp tur a lo ni hi a lawmawm ka ti tak zet zet a. Tin, kohhran leh NGO lian ber YMA te duh loh zu kan ti tawp tur hi a lawmawm ka ti tak zet zet a ni.

Pahnihnaah chuan Health Care tha zawka kalpui tur chungchang hi a ni a. Health subject hi stress subject a ni a, kan Constitution Article 21 kan en chuan kan hmu in a hriat a, Health lamah hian kan thanharh a tul riauin ka hria. Tin, cancer te pawh India ram kan han thlir in kan population zira han thlir hian kan tam em em a. Heng ah te pawh hian stress subject a nihna ang takin research te pawh hi kan beih chian a tulin ka hria. Nitin khawsak, eizawna kawng hrang hrang leh kan nitin ei leh in ah te pawh hian zir chian tur tam tak a awm in ka hria a. Tin, kan ei leh in lakluh, kan thlai thar lakluh te leh keini pawhin kan chin ngei ngei ang chi te pawh hi a kaih hnawih vekin

ka hria a. Tin, kan fertilizer hman dan te thleng pawh hian enchian tulin ka hria a. Tin, pesticide kan hman dan chungchang thleng in vek a ni a. Heng zawng zawng ah pawh hian Health chungchangah hian Mizote hi tun ang zela kan kal chuan kan dinhmun hi a derthawng zualin a hriat a. Chuvang chuan kawng hrang hrangin Health-ah pawh hian tan lak tul ka ti a.

Tin, Health Care chungchangah a invenna lam hi ka ngai pawimawh lehzial a, chuvang chuan Governor thusawi ah hian Pu Speaker, Health Care tha taka kalpui tura ruahmanna a awm hi lawmawm ka ti tak zet zet a ni.

Pathumnaah chuan school timing kan han sawn leh ta dawrh mai hi a lawmawm ka ti a. Khawpuiah, a bikin Aizawl khawpuiah zokhaw lam zirlaite an rawn kal nasa em em a, a tak taka ka hriatte a ni a, an chhungte rawn belin an rawn kal a. School timing sawn hma a nih khan harsatna an tawk nasa em em a. An tho hlawt a, chaw thing zen ngam lovin chaw ei hun pangngai lova school kal naupangte an tam em em a, zirnaah hian zirlai naupangten an tuar nasa em em a ni. Chaw khawpuar ei lovin an drill-naah te tlu tawp tawp te an awm thin a, chuvang chuan kawng hrang hranga han thlir hian school timing hi zokhaw lam kan unaute a bik takin ka lawmpui a. Tin, kawng hrang hrangin hei hi kan that phah dawnin ka hria a, a lawmawm ka ti tak zet zet a ni.

A dawt leha chuan SEDP chungchang hi a ni a. SEDP tha taka kalpui a nih dan tur leh sum sem ringawt a ni lo ang tih Governor-in a sawi kha Pu Speaker, lawmawm ka ti a. Tin, SEDP hi Socio Economic Development Policy a ni a, economics ringawt a ni ta lova. Economics kan dinhmun hi sang thur thur mah ila khawtlang nun nuam, socio security a awm si loh chuan awmzia a awm lo a ni. Hmasawnaah intodelh mah ila khawtlang nun nuam a awm si loha, suicide/intihlumte kan tam viau mai chuan a hlawhtlinna a awm lo a ni. Chuvang chuan SEDP kalpui dan turah hian committee peng hrang hrang 14 lai Board-a siam tur ruahmanna chhawpchuah a ni te khan hei hi a tak takin kalpui a ni dawn tih a lo lang a, Pu Speaker, lawmawm ka ti tak zet zert a. Tin, sum sem ringawt a ni lo, a tak taka kalpui a nih tur thu Governor in a a rawn sawi kha a lawmawm em em a ni.

A tawp berah chuan kan police te thuan thatna tur kawng ruahmanna rawn awm kha lawmawm ka ti a. Chhak lamah ni se international border-ah kan awm a, state ni se khatiang khan tunah pawh Assam nen harsatna eng

eng emaw kan nei mek a ni a. Heng kawng hrang hrang ah hian security point of view-ah pawh kan police te thum that an ngai em em a ni. Pu Speaker, kha kha hun tlemte chhunga ka sawi theih chu a ni a, ka lawm e.

SPEAKER : Pu Lalrinsanga Ralte.

Pu LALRINSANGA RALTE : Pu Speaker, ka lawm e. Governor speech-ah hian lawmthu sawina tur tam tak a awmin ka hria a. A bik takin Governor thusawi ah hian ka bial chungchangah lawmthu sawina tur tam tak a awmin ka hria a.

Hruaitu tha, vision nei tha kan nei a. Chumi ah chuan kan ramin hmasawn kan beisei thu te kan hmu a. Chu chu Zoram mipui leh helaia thu te pawhin kan beiseina, min thlirna a ni a. Zoram mipui mirethei leh changhai zawkte tan kawl a eng chho dawn niin ka hria a, ka lawm tak zet a ni. Pu Speaker, Governor-in kan ram venhimna leh ramria chengte hmasawna lam ngaihtuah leh ngaih pawimawh a ni ang a tih kha lawmawm ka ti a. Nichina ka sawi ang khan kan bial khu inter state boundary kan nih avang khuan ngaih pawimawh leh enbik ngai kan ni a. Chungte avang chuan Home Minister zahawm tak hmalaknain hlawhtlinna keini ah chuan kan han hmu a. Phaisen-ah Police Check Post tha zet mai min siamsak nghal a. Tin, khu lai khu thilsual tih tamna, veivah tamna a ni a. Ramri buai chungchangah lo pawh sualna chi hrang hrang hmun a nih avang khuan ven uluk a ngai hle a. Tunah khuan Phainuam-ah Police Check Post siam leh theih a nih beiseiin VC te nen ramte pawh kan han zawng ho nghal a. Khangah khan hma min lak sak leh theih chuan a lawmawm hle ang.

Tin, Pu Speaker, kan House Leader leh Home Minister zahawm tak te chungah hian lawmthu sawi kan ba nasa hle a. Vairengte-ah MNF sorkar hmasa khan Fire Sub Station leh Sub Jail pek kan ni tawh a. Amaherawhchu, tun sorkar kal liam ta khan a hlamchhiah char char a. Tuna MNF a rawn sorkar leh thla 2/3 chhung lek hian Fire Sub Station min rawn tih hlawhtlin sak leh ta a. Kum dangah ram emaw, in emaw a kanin Lailapur vai ho thelh sak ngaiin kan awm a, a zahthlak hle thin a. Tunah chuan Lailapur vai kan ngai tawh bik lo. He sorkarin ramria chengte hmasawna tura Governor-in a rawn sawi hi keini bialah chuan a takin kan tawng nghal a, kan lawm hle a ni tih ka sawi duh a. Sub Jail, MNF sorkar hmasain a lo pek tawh, kan dah tawl mai mai tawh khu nizanah a kang hlauh mai a. Mahse, pawl a khawih nasat

hmain Fire an lo awm hman hlah tawh a. Vairengte-a Fire Sub Station-a hnathawktuten an thelh mit nghal a, kan lawm tak zet a ni tih ka sawi duh bawk a ni.

Tin, Governor zahawm takin Agriculture lama hmalak te; tin, Agriculture lama kut hnathawktute eizawna leh kut hnathawktute ngaih pawimawh chungchang a rawn sawi pawh kha kan lawm hle mai a. A mak angreng a, kan bial hi. Serlui biala 80% hi agricultural land kan tih, potential area hi a ni a. Chuvang chuan han insawi luh loh tum pawh hian a insawi luh loh theih loh a. Governor thusawiah hian kan lawm takzet a. Khulai hmunah khuan Agriculture lama thiamna sang zawk College emaw, Farmer Training Centre hmun tha takte neih theihna turin he sorkar, kut hnathawktute lam hawi sorkar rawn ding chhuak hian hma min lak sak theih ngei kan ring a, kan lawm hle nghal bawk a ni tih ka sawi duh bawk a. Pu Speaker, Governor zahawm takin Power lama hnianghnar zawka hma kan lak chhohna turte a sawi kha ropui ka ti a. Khalaiah pawh khan lawmthu sawi nghalna tur keini chuan kan nei a. Bikhawthlir tawn tirha Keicham khua khuan kum 10 chung eng an hmu tawh lova, in 30 vel khua a ni a. Power Minister zahawm takin hma min lak sak nghal a. Tunah chuan a line extention na tur te, Transformer leh a ban turte chah a ni a. Kar hnih khat lekah bul tanin eng an hmu nghal dawn a. Khangte kha lawmawm ka ti tak zet a ni.

Tin, Education lamah hmalakna ropui tak kan hmu chho a. School timing sawn te, zirtirtu inkhuangrual lo lutuk semdarh tuma hma lak a ni chho te hi lawmawm ka ti tak zet bawk a ni. Pu Speaker, ka lawm e.

SPEAKER : Tunge sawi leh ang le? Member zahawm tak Pu Lawmawma Tochwawng i lo sawm ang.

Pu LAWMAWMA TOCHHAWNG : Pu Speaker, ka lawm e. Kan ngaithla ta nual a. Kan Governor thusawi bu hi a hming phuah dawn ta ila 'Lawmna Bu' ti ila, vawiina kan tawng leh kan thusawi atang chuan kan phuah soal awm lo mang e aw ka ti a. Tam tak kan sawi takte kha thlawp pahin point hnih khat lek han tarchhuah ve tula ka hriat te chu :

i) No.5-naa SEDP hmanga kan ram khaichhuahna tur atana hmalakna tur kha a ni a. Intodelh, chu pawh chu a dawna dawn ni mai lova keimahni kutke ngeia kan thawhchhuahna tur ruahmanna kan han nei te, hun rei tawh

tak atanga kan buaipui tawh a taka kan han hmang thei turte hi sorkar chakna leh thiltihtheihna ruahmanna hnuaiah Department hrang hrangte nen kan han thawk ho suau suau tur hi thil nghahhlelawm tak niin ka hria a. Kan Chief Minister zahawm tak leh kan House Leader ni bawkin a sawi angin ram mipuite hemi kawngah ke kan han pen suau sua tur hi chu a tak hmuh hlan a nghahhlelawmin ka hria a. Ka tawngkam a dik lo a nih chuan khawngaih takin min lo hrethiam ang a. Economic sovereignty kan ram hian tun atanga rei lo teah hian he SEDP hmang hian kan puang thei mai awm mang e tih te hi rilruah a lo lut a. Thil nghahhlelawm tak niin ka hria.

No. 6-naah khan Assam Rifles Aizawl khawpui laili atanga sawn chhuah tur khan ka mit a la zar mai a ni. A han sawi pawh khan ngaihnaawm ka ti a. Kan Pathian thu, ‘engkim tan hun ruat a awm a, thil phun hun a awm a, thil phun phawi hun a awm’ tih ang deuh khan a hun takah he sorkar thar, kan House Leader Pu Zoramthanga hruaina hnuai a he hun lo thleng hi mitin kan lawm ka ring a. A bikin Aizawl khawpui chhung, Zofate Jerusalem atanga an insawn chhuak tur hi thil lawmawm tak a ni. A hun lai chuan an tangkai viau thin a. Tunah erawh chuan mipui kan lo pun tak avang hian mit mim ang mai a lo ni ta a. Chu mit mim lak boa a awm tur ang hi thil thlakhlelawm tak niin ka hria a. He thu hi ka hriat tirh chuan, ‘E khai, lawmna hi uar tawka sawi a va har em! Beng thleng thlenga bawp khaia lawmna chi a nih hi a, a nih loh pawhin ngawi rengin mahni in rizai hnuai a in lukhup ila, lei chhuah zawk zawka nui chung a he thu hi chu lawm chi a nih hi a,’ ka ti a. He thu Governor sawia a lo lang chhuak hi thil lawmawm tak a ni.

Chu bakah chuan kawngpui siamna tur chungchang Governor thusawi point 8-naah khan a lo lang leh a. Lunglei atanga kan lo kal atangin hei hi chu lawmna tur ka hmu nghal a. Kum 8, kum 10 dawn kal ta kha chuan Lunglei to Aizawl kan lo kal hian darkar 7, darkar 8 dawn dawn kan hmang a ni. Tun tumah erawh hi chuan darkar 5 kan rawn hmang a, kan rawn tlan chak vak lo bawk a. Tin, hmanhmawh deuh phei chu darkar 4½ ah te an thleng thei a ni. Tun thla hnih lek chhung hian pawh chu nuamsa taka kan rawn tlan thei hi lawmawm ka ti a, hmabak a la awm a. Kan hmabak pawh hi rei lo te ah zawh theih mai niin ka ring. Hengte hian a takin min ti lawm a ni.

Lei dawh tur chungchang lo lang hi a lawmawm ka ti khawp mai a. Pahnih lekin an zawh chim mai mai loh tur lei kan dawh dawn niin ka hria a,

thil lawmawm tak a ni. Tunah hian hmabak engemaw zat a awm mek a ni tih te pawh a lo lang a. Nghahhlehawm tak zet zet in ka hria. Governor thusawi ah hian lawmna tur tam tak zingah heng te hi thil lawmawm niin ka hria a. Tui in tur a tlem zel a, tuihna a tlem zel a. Point 10 na ah khan tui in tur hnianghnar zawk kan neih theih nan tunah hian hma lak a ni dawn, a ni mek tih lo lang hi a lawmawm tak zet in ka hria a. Lunglei Greater Water Supply Scheme Phase-II te pawh hi rilruin a lo ngaihtuah nghal a ni. Kan nghakhlel tawh tak zet zet a. Heng thil te hi a takin lo thleng se kan ti mek bawk a tih te hi ka ngaihtuahnaah a awm a.

A tawp berah chuan Pu Speaker, point no.17 naah khan Mizo identity, tradition & value te a lo lang a. Chubakah chuan Mizo inunauna te, India ram leh pawn lamah tih lo lang hi a ropui ka ti. Hmasawna hrang hrang leh changkanna te hi nei erh urh mah ila, kan sawi tak te pawh kha nei vek mah ila, kan Mizo nihna a bo si chuan a va hlu awm chuang lo ve! Mizo nihna kan hloh si chuan heng hmasawna zawng zawng te hi tunge nei ta ang le ka ti a. Pu Speaker, minute 1 please. Tichuan, Mizoram chhung chauh ni lo, India ram chhung chauh pawh ni lo, India ram pawn thleng thlenga Mizote insuihkhawmna tur lo langte hi a international ruih mai a, a nghahhlehawm riauin ka hria a ni. Heng point tlem te (tam tak zingah hian) ah hian Governor thusawi chungchangah lawmthu ka han sawi a ni.

SPEAKER : Tunge sawi leh ang le? Opposition Group Leader kan sawm tawh mai dawn em ni ang?

Pu Lalduhoma, member zahawm tak i lo sawm ang. Ani hi 10 minutes aw.

Pu LALDUHOMA : Pu Speaker, ka lawm e. Governor's Address para 23-naah hian kan sorkarin sum a hmuh beiseite kan hmu a. Chungte chu electric bill te, tui bill te, vehicle tax te, lottery te, Geology & Mining atanga chhiah kan hmuh te a ni mai a. Mimal emaw, kuthnathawktute emaw, entrepreneurship lam emaw atanga production atanga kan GSDP te, kan per capita income te lo pung tur lam hi tlar khatmah ziah a ni lo a. Mipuite iptea pawisa fai awm sa zen chhuah sak atanga kan revenue hi tihpun tuma kal dan hluia kan la kal zel a nih hi chuan a beidawnthlak mang e aw ka ti a. Tin, electric bill te phei chu 7% atanga 10%-a tihpun tum a nih thu kan hria a. An

sorkar hmasak khan nasa takin an tipung a, total bandh kan siam phah hial tawh a, electric bill-te hi tihpun leh an tum nge mawni ka hre lo a.

Tin, vehicle tax-te pawh kum 15 chhung sorkarin a la lawk a, nasa takin kan duh lo tlang a, kan dodal tlang a, tunah erawh an duh ta viau mai em ni? Sawi engmah Governor's Address-ah hian a awm ta lo hi pawh hlein ka hria a. Kan rama eizawngtute, primary leh secondary sector-a eizawngtute tan tal hian production a lo pun theih dan zawng thei sorkar kan mamawhin ka hria.

Tin, para 3-na leh 14-naah hian mau chungchang a lo lang a, mau hi kan ngaithla zing a, mau chi tha khawvela mipakhat chauhin a hriat te leh a chi siam nan pawh kum tam tak ngai chi ang te kan ngaithla thin a, a tha tho e. Kalpui zel ila a tha a nih phawt chuan. Ka sawi duh chu Pathianin mau tak tam tak min pek sa a awm a, a riral reng a, kan halral reng a, nitin Cachar lamah an tawlh thla dul dul a, hei hi engatinge a hman tangkai dan kan ngaihtuah tho loh? Paper Mill te pawh kan din thei lo em ni? Hnam Chhantute pawhin chhungkaw engemaw zat eizawn nan an lo hmang thei tawh a. Taiwan technology-te nen pawh han tang tlang ila, a plantation ringawtah pawh hian chhungkaw tam tak kan inbengbel ve theiin ka ring a. An sorkar hmasaka BAFFACOS sum hnuaiia Bamboo Factory a hlawhchham vek ang te kha thleng tawh lo se ka duh a. Chuvang chuan, Pathianin min pek sa kan mau te hi, chi tha zawk kan hria a nih chuan kan ti tho ang a, a awmsa hman tangkai dan hi ngaihtuah a ngai hlein ka hria.

Tin, Law and Order chungchangah hian household registration leh border area ven uluk chungchang lo lang hi lawmawm kan ti a, hetah hian full support kan pe a. A bik takin hei hi a tanna tur lai, a sensitive area pawh kan neiin ka hria a, a tanna tur area atangin heng te pawh hi tan thei ila. Hemi pah a ka han sawi duh chu Law and Order min venpuitu ber chu mahni veng theuh ah kan VDP te an ni. Chu chu kumtin hian ₹ 5000/- pek an ni ve thin a, ka hriatsual loh chuan tun financial year kal mekah hian an la dawng miah lo a ni. Chawhma lamah khan The Mizoram Village Defence Organisation (Amendment) Rules, 2017 kha a copy min pe a. Khatah phei kha chuan thlatin ₹ 1000/- pek tawh tur tiin a lo lang a. Chuti a nih chuan he ₹ 5000/- tun financial year kal laia la pek loh hi pek vat ni thei se a tha hle ang tih ka sawi duh bawk a.

Tin, kawng chungchangah, quality uluk taka kawng tha neih kan duh thu a lo lang hi lawmawm ka ti a. Hetah hian quality control division te pawh kan nei reng a, chhawr tangkai an ni ngai lo reng reng a, hawh u, i chhawr tangkai tawh teh ang u. Kan bitumen quality te pawh nuthlawi leh vai tu tute emaw, a supply-tu ngaiin an supply reng ringawt hi hmang tawh lo ila, kan lung quality te pawh hi endik teh ang. Kawng tlo deuh i nei teh ang. Hetah hian kan sorkarin tih tak zetna thinlung an pu a nih phawt chuan an kaihza veng tur hian kan in peih reng, theihtawp kan chhuahpui dawn a ni tih ka han sawi duh a.

Tin, para 5-naa SEDP flagship programme ber mai hi, hetah hian a approach-ah hian political approach hi a tel tlat mai a. SEDP-a political approach chu engnge maw ni dawn aw ka ti a, vote zawn nan te hian hman an tum ve leh ta mai nge ni, helai hi a awmzia ka bangbo viau a. Tin, kan House Leader zahawm tak hian Thingdawlah leh hmun dang dangah sawi dan a nei a, Zoram mipui hian kan hre bel hle a ni, chhungkawtin hnenah ₹ 3,00,000/- aia tlemlo pek, hei hi kan hre bel em em a ni. NLUP dawng tawhte pawhin ₹ 3,00,000/- chunglam in dawng leh vek ang tih hi Zoram mipui min tiam a ni. Project in siam ang a tih lam an sawi ngai lo. Kan sorkar hma leh sorkar hnua kan au dan kan thlak thin hian kan ram mipui hi a tiluhai tawh tawh. Vawiinah hian inthlan hmaa kan ruling te au dan leh tuna an sawi dan hrang ta daih si hian mipui te a ti beidawng mek a, hei hi an pha dawn a nih chuan Pu Speaker, ka mobile-ah hian a video ka play nghal thei reng, a finfiahna a awm reng. Chuvangin tunah chuan, ‘sem lam kan ti dawn lo,’ a ti ta daih a, ‘a project a zirin’ a ti leh ta daih a. Hei hi hmanah khan sawi ang hmiang! Heti zawnga an sawi loh avangin an tlin phah te pawh a ni bawh lawm ni? Hei hi an tih tum dan leh tuna an au hla lo danglam ta hian Zoram mipui te a engamah hma hian min ti beidawng tih hi ka sawi duh a. Tin, helaiyah hian lawm em emna ka neih chu ZPM policy dik zia an rawn hmu chhuak ve a, he SEDP kalpui nan hian Handholding policy kan hmang ang tih hi lawmthu ka hrilh duh a ni. A tir atang khan lo ti ve hle hle sela, he kan policy tha tak hi an rawn hmang dawn a nih chuan kan tawiawm peih reng.

Tin, para 22-naah buhfai chungchang kan hmu a, ni 21.8.2018-ah khan Zoram Times leh chanchinbu hrang hrangah, ‘kan sorkar chuan vai buhfai in ring tawh lovang,’ tuna kan sorkar hotuten an tih thu hi a lo lang chuai chuai a ni. He Governor’s Address-ah hian vai buhfai leina tur pawh pawisa a

harsatzia te an tarlang ta mai mai zawk si a. Engtik atangin nge vai buhfai ring lo hian min siam an tum? Engatinge hei hi a lan leh tak si loh tih hi ka zawt duh a, chu pawh chu a video ka kawl reng mai, chutiang chu a ni. Tin, sugar/chini kan sem leh ang che u min ti a, hei pawh hi engtikah nge min sem dawn? Kha kha a lang lo bawk a, hriat kan duh viau a ni.

Tin, parking chungchangah hian parking problem leh traffic jam awm lohna India ram state capital awmchhun nih min tiam a ni, a video a awm hetah hian, min tiam a. “Hei hi in awih lo mai thei, amaherawhchu, hei hi kum 2, kum 3 hnuah chuan a lo ni tak maw in la ti dawn,” tih hi min tiam dan a ni. Tunah erawh chuan parking chungchang chauh kan hmu a, kawng chhawng chungchang pawh ziah lan a ni lo a, chutiang chu thil awm dan a lo nih leh tak avangin, hmana an sorkar hmasak khan parking hi an bei vak a, a fail vek tih kha kan hria a, khatiang ni tawh lo khan parking na na na hi chu ziaawm deuha siam theih a ni tih hi keini pawhin kan chiang a, chumi tur chuan kan sorkar hian tan la se kan duh a. Amaherawhchu, Aizawl khawpui kawng ching fel tura Governor meuhin a survey hna Chief Minister-in a thawh thu a rawn sawi lang hi chu a zialo lampang deuh niin ka hria. Hengte hi chu politician ten kan tih tur a ni dawn em ni, survey te thleng thleng hian? Engineer tam tak kan nei a ni lawm ni ka ti a ni.

Tin, school timing chungchangah hian ram pumpui inang tlanga han kalpui ringawt hi a felloin ka hria a. A dan pawh hian a phalsakin ka hria a, mahni khuaah nu leh pa te leh zirtirtuten tha an tih anga kalpui a, free hand pek hi a tha mai lo em ni? Chutiang duh khua an awm chuan zalenna pe mai ila, thu neih pui tum lo ila. Khawi maw lai khua tana tha kha a piah leh khaw tan a lo tha kher lo thei a. Tichuan remchan zawkna ka inpek theih te kan beisei a ni.

A tawp berah kan ti tawh mai ang e Pu Speaker. Sorkar a inthlak hian thil nuihzatthlak deuh hi a thleng thin a. Hmanah i dinglam amite an sorkar lai khan Millenium Center tur kha an lai khuar a. Pakhat an rawn sorkar veleh a, an chhilh leh a, an lai khuar leh a. Tunah hian hman amite an sorkar lai khan New Capital Complex tih kha vuah a ni a. A hnuah sorkar a lo ding a, New Secretariat Complex tiin an rawn thlak a. Tunah New Capital Complex kan ti leh ta a.

Hetiang mai maia sorkar a inthlak avanga inkhualtelem ang maia thil kan ti kan ti hi tun amite ka dem bikna pawh a ni lo, a hrim hrim thuah sorkar hmasain kuta lo thlak tawhna leh thil dangte hi inzahsak teh ang. A thenin an lai khuar a, a thenin an chhilh, an lai khuar leh a. Khatiang ang chi hming te pawh hi hetia kan thlak kawii kan thlak kawii dawn a nih hi chuan a tha lo a. (Speaker: I thlak tawh lo ang u i tihna a ni maw?) A! thlak tawh loh te pawh tha ka ti a. Tin, a vuah hmasatute pawh an rawn sorkar leh a. A vuah hmasatute vuah te kha zah sak ve te pawh hi a tha alawm mawle. Ka lawm e.

SPEAKER : Tunah House Leader zahawm takin wind-up na rawn nei se, hun i lo pe ang.

Pu ZORAMTHANGA, CHIEF MINISTER : Pu Speaker, ka lawm e. Member thahnem takin motion of thanks-ah hian thusawina an nei a, a lawmawm hlein ka hria a. A tlangpui thu in lawm pawh kan lawm tlang a. Hemi lawmna ah hian Congress Group lama kan hotute an tlem deuh hlek a. Anni pawh lawmthu han hrilh ve ka duh tehlul nen!

Keini sorkar chu kan hriat angin December ni 15 bawr velah thutiam kan la a, krismas leh kumtharin min nang a, a engamah a kal hmanlo a. January thla, kumthar kan han hmang a, khami in a ken tel ah ni eng emaw zat sorkar anga function hleihtheih loh in a kal a. Tunah hian thla 2 emaw kan kal a ni chauh a. Chu pawh chu sorkar ruangampui, a structure indin chhohna tur atan kan han ti nawk nawk rih chauh a ni a.

Chuvangin hemi chhung hian keini sorkar kal mek hian kan thiltum te eng eng emaw, a bul tanna tlema zawng han tan tih chauh lo hi chu engmah tih hman kan nei tak tak lova. Heng, tuna reference tam tak hi chu sorkar hmasa hunlai, nikum lam amite pawh a ni a. Chuvangin kan hma amite pawhin sorkarna lo kengtu ten tihfuhloh palh tam tak pawh an neih rualin tihfuh leh thil tih that lawmthu sawina tur pawh tam tak a awm a. Chungah chuan Governor thusawia lawmthu kan sawi hian keini MNF sorkar a din chin a tlem te lo tel ve tih bak kha sorkar hmasate thil tih chungah lawmthu sawina te pawh a ni a. Chuvangin hei hi a lawmawm ka ti a. Keini tih tlemte bakah kan hma amite thil tih pawh lawmthu sawina tur kei pawhin ka ngah a ni tih ka sawi hmasa duh a ni.

A dawt lehah chuan kan Governor thusawi hi tlem te a ni a, a point pawh a tam lo a. Chuti chung chuan a hawl kual tam viau zawk a, han sawisen rual a ni lova. Mipui, a nuai tel awmkhawmte tana thil tul, khaw tam tak tana thil tul, veng tam tak tana thil tul leh state puitling ve tawh tana thil tih tur, ram thleng ni se Israel ram aia lian zawk kan nei a. Chumi te tana hmachhawp leh tih tur chu he Governor thusawi reilote ah hian hawl kim sen rual a ni lo a. Tlema zawng a sawi mai a.

Heng hi engatinge in sawi tel loh, heng hi engatinge hmaih a nih tih kha a dik vek a. Sawi tel dawn vek se chuan ninawm tham a awm dawn a. Chuvangin a pawimawh zual eng emaw, a guideline ang deuh chauh, session hmasa berah Governor hian a sawi a. Tute tih dan takah emaw kan Governor pawh tharlam baw, kan sorkar pawh tharlam baw. Chuvangin a engamah hi duhthusamin a la chhuak hmanlo a. Amaherawhchu kan chhawpchuah tur erawh chu a vision tlema zawng kan han sawi tel chauh a ni.

Point thenkhat ka han sawi duh chu member pakhatin a sawi Assam Rifles hnawhchhuah thuah khan an Mandir te leh Commandant in te leh thil dang te hi tih a awm a, a dik e. Kan tum chu ram kan leisaka kan inthleng hian Assam Rifles ram zawng zawng kha chu a huam vek a ni. Amaherawhchu a indawt dan erawh chu sawlama an lo inpeih tawklorna lai te awm a ni a, helama han hnufual deuh te pawh a awm thei. Mahse a vai hian heng hi chu ram kan leisak saw dik tak chuan awm sen lohna tih tur a ni, a zau khawp mai a. Heta an luahlai let engemaw zat a ni. Chuvangin sawtah sawn an leng vek turah kan ngai a. An chhuah vek pawh kan beisei a. Chumi tur chuan a nawr pawh a tul a nih chuan kan innawr ang a, innawr vak pawh ngai lovin thuneituten insiamremin, remruat tlangin hetah hi chuan Assam Rifles ten henglai hmun te hi an kalsan a sawta mumal taka an inbenbel theih kan beisei a ni. Tin, point tam tak sawi tur a awm ang a. Entirnan, keimahni Aizawl khawpui ah chuan kan buaipui ber mai chu tunah chuan traffic jam a ni a. Hei hi keini pawh keimahni vision-ah engatinge engineer ten hengah hian study-na an neih loh tihah khan an nei nameuh ang a, amaherawhchu sorkar siamtu ten study-na neia vision kan neih loh chuan sorkar hnathawk ringawt ah kan inngat theilo. Political leader kan nih chuan vision kan neih a ngai a. Tin, vision apiang kha a tuka puitling nghal mai tur pawh a ni baw, lo.

A then chu kum khat hnuah, kum nga hnuah, kum sawm hnuah, ram develop ni tur chuan a kum zabi, a then phe chu kum sang lo tling tawh, Europe-ah te pawh an awm a. Chung em em chu tunah phe chu chuan a tul hauh lo. Hun a hmanhmawh a, system a chak tawh a. Chuvangin reiloteah tunhmaa an tihhlawhtlin theih loh kha hun tawite ah a tihhlawhtlin zung zung theih a. Chuvangin chak zawka kan kalpui theih pawh kan beisei.

Chuvangin Aizawl khawpuiah parking system, sorkar hmasaka kan tih kan hlawhtling tawh lo tih kan accept thlap. Amaherawhchu mihring hian fin tawh loh kan hmasak a, fin deuh hlek hi chu kan hnahnun thin a. Chutiang chu keini pawh kan ni a, midang pawh an ni ve tho in ka ring a. Upa thu in at kan hmasak a, fin kan hnahnun thin a ni an tih ang deuh in politician pawhin, official pawhin, ram hrulaitute pawhin tihfuhloh laiah an tan a, chuta tang chuan an zir thiam a. Tichuan tihfuh ah, ram development ah an kalpui thin.

Tun tumah pawh parking system hi keima mimal pawhin ka ngaihtuah nasa a. Sorkar hmasaka kan tihfuhloh te enin tun tum zawng mipuiin an chak zawngin parking system hi kalpui teh ang kan ti a. Tuna reilote kan hawn chinah pawh an rawn inchuh tak tak a. ‘Kan in hi parking house atan kan phal e,’ an ti a.

Kan la inrefel hmanlo a. Election puan a nih avanga min daltu thil tam tak a awm a. Nichina kan sawi tawh ang khan hnapui kan tan dawn chauh a, election puanin min han nang a, financial year tawpin min han nang leh a, tichuan a buaithlak hi a inhmuh khawm laklawh a, chutichung chuan kan kal pel mai ang a, mumal zawkin kan la kal turah ngai ila. Kan parking house system tur pawh tunah chuan an rawn dil tak tak a. Financial year tharah crore eng emaw zat dahin chutatang chuan kawngsirah pawimawh chinah parking house han ding fer fur sela, kawngsirah motor park a awm loh na na na chuan a ziaawm a. Tin, kawng chhawng pawh kha tih kan tum ngei a, kan uluk ber a ni a. Amaherawhchu sawi tawh angin hetah hian a vai hian kan rawn zia kim hman lova, kha kha chu keini pawhin kan pawm e, hmanhmawh takin Governor thusawi tur pawh an rawn draft-a. Thil dangah chuan Vaivakawn amite, Bawngkawn amite khang kha tan lak nasat zual tur a nih avangin an rawn tarlang a, amaherawhchu ziah kim loh a nih avang khan kan ngai pawimawh lo a ni hauh lo a, kan ngaihpawimawh berte zing ami a ni. Tin, member zahawm

takte hnena ka sawi duh chu reilote chhunga kan han ti chung hian Bawngkawn fly over tur leh Vaivakawn fly over tur leh heng Chaltlanga tunhmaa DC Workshop kan tih thin inter-state bus terminal tur atana kan tih Engineer ho chuan a tlangpuia an tih dan chuan Bawngkawn fly over saw chu crore 100 bawr vel a ni ang a, Vaivakawn pawh khu crore 100 bawr vel a ni thei ang a, inter-state Bus Terminal (ISBT) saw chu crore 100 atanga 150 a ni lo berah a ni ang an ti a. Chu pawh chu tunhnai teah khan principle approval minrawn pe tawh nghe nghe a, chuvangin khang kha detail project uluk taka a zat chiah tur kan hriatah sorkar tharah hian pawisa pawh khatiang kha la a hna kan tan thuai theih pawh kan beisei a, hei hi kan harsatna kan vaia min tibuaitu a ni a, chuvangin a dang pawh kalpui chhoh zel kan tum a ni.

Health Care chungchang pawh kha nakinah Budget-ah kan la rawn entir ang a. Kan tum dan chuan kan Health Care, miretheite damdawi ina an inenkawlna tih loh theih si loh, pawisa nei si lo (MLA-te phei chuan kan buaipui em em) heng hi sut kian hram hram kan tum a. Chuvangin a capital-a heta kan dah tur hlawm eng emaw zat, tha thawkhat, (duhthusam lianpui chu vawikhat financial year-ah chuan kan dah kim thei lo ang a) leh chumi interest pawh nghak lova direct-a hman nghal tur crore engemaw zat chu kan rilruin dah kan tum a. Nakinah full Budget kan tih hunah amount kimchang leh zualin kan la rawn dah ang a, MLA-te leh mipuiten harsatna kan neih, Health Care avanga hrehawm kan tawrhna hi chuti lutuka kan buaipui lutuk loh tura theihtawpa sut hek tan kan tum a, kan priority, kan ngaih pawimawh zingah kan telh a ni.

Tin, Education lamah pawh hmalak dan kawng chi tinrengin zirtirtute pawh lak belh loh theih a ni lo ang a, transfer leh thil danga buai lovin an khua ami emaw, a hnai ber ami transfer lam problem awm lova kan lak theihna turin hma pawh chhawp chhoh kan tum a. Amaherawhchu education policy detail vel chu vawiinah sawi hman a ni lo vang a. Chulovah chuan kan sorkar hnathawkte pawhin an complain ber chu a lian lam leh a chunglamte hi chu pension an awm hian an in hrual phui chho zel a, problem lian pawh a awm lova, a te lam kha lak a awm si lo a, tunah chuan a hniam lam hi kan buai tawh a ni. Police-ah phei chuan constable ringawt pawh 2000 rual lak ngai khawpin an awm tawh a, kan phur a rit hle a, chung zawng zawng chu kan face tur, kan sut tur a ni a,

chung chu englekawle lak belh chhoh zel pawh a ngai dawn. Hna thawktu hi a te lamah, a hniam lamah a thawktu field worker-ah kan tlachham deuh a, chung chu theih ang tawka kan in hrualphui chu a ngai dawn a ni.

Thil dang ka sawi leh duh chu Prohibition pawh kha a Bill an rawn sem tawh emaw ka hre lova, tun tuma introduce tur a ni a. Prohibition pawh kan han kalpui ang a a hmasa ami remchan loh avanga 31 March, 2019 thlenga kallo theilo a awm lai khan kan theihtawpin Prohibition hi chu kalpui hram hram turin hma lak kan tum a. Tin, Household registration kha kan ngaipawimawh a, tha kan ti tlang a, a lawmawm hle a, theihtawpin bei tlang ila. Kan ramah Burma lam side-ah ni se mipui maktaduai 50 atanga 60 inkar Burma an awm a, Bangladesh lah maktaduai 150, 160 vel an awm a, helam side India lam side-ah pheichuan maktaduai 1000 an awm a, chumi karah maktaduai 1 kan awm a ni a. Kan ram a zau a, a tha si a, miin rawn awm an chak si a, kan in ven uluk loh chuan chimral kan awlsam lutuk dawn a, chuvangin heta kan inven theih nan Household registration hmang turin society, sorkar nen kan phek tan a ngai a, kha kha bul tan nan kan theihtawpin hma kan han chhawp mek a ni.

Thil dang sawi tur tam tak a awm ang, SEDP te pawh kha nakinah chiang leh zualin kan sawi ang a, nuai 2/3 kan pe ang tih kha ka rin dan tak chuan a thenah chuan nuai 3 tlinglo te pawhin a daih ang a, a thenah chuan nuai 3 pawhin a daih ka ring lo a, nuai li 4/5 development-a han hman tak tak tura leilet kan han siam sak tak taka, ram kan han develop pui tak taka, kan thlai chin 2/3, kum 4/5 puitling tur chuan rin aiin chhungkhata kan pawisa sen tur hi a tam ang. Amaherawhchu pawisa kha in sem kual ringawt lova thil danga duanga duh duh hman ang chi ni lovin, Society kal tlangin, Co-operative Society-te kaltlangin khamite enpuina leh hriatpuina hnuaiah he kan project pui hi chu kalpui kan tum a, a hlawhtlin ngei pawh kan ring bawka ni.

Tin, tlema thil thar deuh hlek ka rilrua lo awm, (a dik maw diklo maw) kan ramah Cancer a tam em em mai a, HIV leh thil dang chu a chhan leh vang pawh kan hre sa vek a, kan hriat hleih theih loh chu zuk leh hmuam, zu leh thil dang ti lo pawhin mak tak taka cancer kan nei tam em em a, heng hi kan mithiam tam takin an chhutna ah hian kan thil ei ah hian nichina kan ngaihthlak ang khan insecticide-a kah thlai kan han ei leh

hlauhawm dan te; tin, chemical fertilizer hmanga thlai kan tih chhoh kan han ei leh Silchar lamin engangin nge an rawn tih kan hre si lo, kan lei lo thei si lo. Hemi kalchhovah hian mi invawngfel tak takte pawh mak taka cancer vei kan awm a. Hemi hi kan fight tur niin ka hria a.

Thil thar tak, tukin khan South India lam atanga mithiam inti, company lian inti, Canada lamah te pawh kan hralh nasa tawh e inti ‘insecticide hi bio atanga hlauhawm miah lova siam, chu chu international pawhin an certified tawh kan nei e, in hmang nghal thei, mi kan hmantir nasa tawh a ni, an ti a. ‘Chumi leh bio-fertilizer hi hemi chemi-fertilizer nen a tlangpui thu in a man a inang, tlema a to deuhna leh tlawm deuhna laite pawh chu a awm, mahse a tlangpuiin a inang e, chu chu Mizoramah hian kan rawn tih ve ang che u,’ an ti a. ‘Kan indawr dawn nia, kan mithiamten han exam sela, certified-na mumal in nei maw? ka ti a. ‘Kan nei teh meuh mai, in rawn check dawn nia’ an ti a. Hei hi ka rilrua awm kumkhua a ni a, nangni pawh a nih ve ngei ka ring a. A dik leh dik loh chu ka la proof bik lova, an insawi rinawm khawp mai a. Khatiangte kha tak tak a nih chuan kan ramah Agriculture leh Horticulture-ah hian kan insecticide hmante hlauhawm lova kan thlen theih a, kan chemical fertilizer-te hmang lova kan kal theih chuan he hi solve-na ropui pakhat a nih theih ka ring a. Engmah a proof-na ka la nei biklo na a, kan ngaihtuahnate kan lo exercise tlan nan ka sawi tel a ni.

Engpawhnise Pu Speaker, sawi tur a tam khawp ang a, amaherawhchu, ka sawi sei bik lutuk chuan a tha lovang. Session kan tan dawn chauh a, nakinah Budget-te pawh kan la ti ang a, demand wise-te pawhin kan la kal ang a. Vawiinah chuan Governor thusawi atanga lawmthu sawina tur a ni a. Hemiah hian ka sawi duh chu, ka’n repeat leh ang a, keini chuan kan vision tlema zawnga bul kan lo tan, tun thla hnih khat chhunga theihtawpa kan lo beih leh hma kan lo lak eng emaw zat chu a awm, chungha chuan lawmthu min han sawipui chu kan lawm khawp ang a. Amaherawhchu, kan hma ami sorkar hmasain thil an lo tih tam tak pawh thil lawmawm tak tak tam tak awm a, chungha pawh chuan lawmthu kan sawi tlang bawka a ni tih hriain Governor thusawi hi vawiinah hian lawmthu sawina lungrual takin pass tlang ila a lawmawm khawp ang tih ka rawn sawi a ni e. Pu Speaker, ka lawm e.

SPEAKER : Aw le, tunah chuan Motion neitu MLA zahawm tak Pu F. Lalnunmawia sawm ila. Sawi tur tul a tih ang angte han sawi sela, adopt rawn dil nghal se. I lo sawm ang.

Dr. F. LALNUNMAWIA : Pu Speaker, ka lawm e. Governor zahawm tak thusawi chungchang kha kan han sawi tlang a, member zahawm tak ten kan lawmthu kan sawi hlawm a, kan zain kan lawm deuh vekin ka hria a. Tin, opposition group lam pawh a tam zawk chuan min lawmpuiin ka hria a, lawmawm ka ti tak zet a ni.

Pu Speaker, Mizoram Governor zahawm tak thusawi chungchanga kan sawi takte leh lawmthu sawina Motion of Thanks ka han move hi he House zahawm tak hian min pass pui turin ka ngen e.

SPEAKER : Mi 18-in kan sawi a, kan sawi ngaihnawm hlawm khawp mai. Governor thusawi chungchanga lawmthu sawina Motion, “That the Members of the Mizoram Legislative Assembly assembled in this session are deeply grateful to the Governor for address which he has been please to deliver to the Assembly on the 12th March, 2019” chu kan sawiho ta a, adopt remti apiangin ‘Remti’ ti rawh u le Members : (Remti).

Remtilo kan awm em? Kan awm chuan ‘Remtilo’ ti rawh ule. Kan awm loh chuan kan Motion sawiho chu lungrual takin he House hian a adopt ta a ni. (Dr. F. Lalnunmawia : Pu Speaker, ka lawm e). Vawiina kan business chu kan zo ta a, naktuk ni 14. 3. 2019 (Ningani), 10:30-AM ah kan thukawm leh dawn nia.

Sitting is adjourned. 3:24 PM